

# ՀԱՅԻ ՈՒ ՀԱՅԱՍՏԱՆԻ ՊԱՏՄԱՓԻԼԻՍՈՓԱՅԱԿԱՆ ԸՆԿԱԼՈՒՄԸ ԿՈՍՏԱՆ ԶԱՐԵԱՆԻ ՕՐԱԳՐԵՐՈՒՄ

ՆԱՐԻՆԷ ՊԵՏՐՈՍԵԱՆ  
Sinner\_arm@mail.ru

Կոստան Զարեանի օրագրերում աշխարհագրական ամենափոքր մի-  
աւորը քաղաքն է, ինչը մենք քննել ենք Հայկազեան Հայագիտական  
Հանդէսի համարում: Դիտարկման անհամեմատ աւելի մեծ տիրոյթ են  
կազմում երկրները: Այստեղ գործում են մեկնարանման զարեանական  
նոյն սկզբունքն ու մեթոդը, այն է՝ երկրներն ու ազգերը, ինչպէս քա-  
ղաքների պարագայում է, դասակարգւում են որպէս մշակոյթի ու քա-  
ղաքակրթութեան սկիզբը կրող հաւաքականութիւններ:

Զարեանի օրագրերին բնորոշ են ազգագրական ու աշխարհագրա-  
կան լայն ընդգրկումներ: Սխալ կը լինէր դրանք վերագրել հեղինակի  
աստանդական կեանքին կամ այլ հանգամանքների: Ճիշտ հակառակը:  
Զարեանը, իրրեւ խորունկ արուեստագէտ, սահմաններ չի ճանաչում ո՛չ  
արուեստում, ո՛չ իրական աշխարհում եւ ո՛չ էլ տիեզերքում: Նրա հա-  
մար առհասարակ սահմաններ գոյութիւն չունեն, ինչպէս գոյութիւն  
չունեն մշակոյթի համաշխարհային դէմքեր հանդիսացող Լէոնարդո դա  
Վինչիի, Դանթէի, Գէօթէի, Հոմերոսի ու Նարեկացու համար: Նրանք,  
ինչպէս եւ Զարեանը, «աշխարհաքաղաքացի» են, ուստի գերծ են կա-  
պանքներից, պայմանականութիւններից: Ազգագրական ու աշխարհագ-  
րական ընդգրկումները, սակայն, ընդհանուր միտում են յայտնաբե-  
րում օրագրերում՝ գտնել, մատնանշել այն իւրայատուկը, որ բնորոշ է  
միայն տուեալ երկրին, ցուցադրել այն ոգին ու մտայնութիւնը, որով եւ  
որի շնորհիւ շարունակում է ապրել տուեալ էթնիկ հանրոյթը կամ ազ-  
գը՝ լինի աւանդոյթ, մշակոյթ, լեզու, կրօն թէ այդ ամէնի միասնութիւ-  
նը: Ահա թէ ինչու իւրաքանչիւր երկիր Զարեանի համար մի առանձին  
գեղարուեստական «պոէմ» է՝ գունագեղ ու կատարեալ, որ իր ուրոյն  
դրոշմն է դնում անհատի, նրա ինքնագիտակցութեան, ազգային ինք-  
նութեան, երեւակայութեան ու ստեղծագործական հոգեվիճակի վրայ՝  
իրրեւ երկնային պարգեւ «Ամէն մի վայր, ուր ապրում ենք, մեր ինքնա-  
գիտակցութեան նոր թելեր է տալիս: Անհատը հարստանում է բլրի, լե-  
րան, դաշտի, ծովի ծածուկ առաքինութիւններով կամ, խրտուած ձիի

նման երկու ոտքի վրայ կանգ է առնում, ինքնապաշտպանութեան համար: Եսը հիստում է լոյսերի ճառագայթման ակունների տակ...»<sup>2</sup>: Եւ, այնուամենայնիւ, Ջարեանի համար կայ մի բացառութիւն՝ չնայած իր անկատարութեանը: Դա Հայաստանի՝ տակաւին անաւարտ դիցավէպն է, չբացայայտուած հայ ոգու եւ ինքնութեան խորհուրդը, պատմափիլիսոփայական հայեցակարգը:

Հայաստանը Ջարեանի համար կեցութեան ձեւ է եւ սկզբունք, կենսագրութիւն է եւ ստեղծագործական կեանքի իւրօրինակ վաւերապատում, սեփական ինքնութեան բացայայտման միջոց եւ ուղի. «Թող իմացուի, - մի առիթով ասում է գրողը, - որ մենք կրում ենք մեր մէջ մեր Հայաստանը, ինչպէս մի տիեզերք, ինչպէս մի ճակատագիր: Նա ցեղի հետ կապուած սկզբնասկիզբ այն ոգեղէնութիւնն է, որ գետեղուած է մեր էութեան ծալքերում եւ որով ներշնչում է մեր ստեղծագործական թռիչքը»<sup>3</sup>:

Օրագրերում Հայաստանի պատմափիլիսոփայութեան զարեանական հայեցակարգը ստեղծում է մի ուրոյն համակարգ, որ մակածւում է ազգային հանճարի եւ ոգու, ապա նաեւ բնութենապաշտական եւ պատմադիցարանական հաւաքականութեան մեկնարանման սեփական համակարգից, որը գրողը գետեղում է երեք հիմնական տիրոյթներում՝ երկիր (=մարմին), ազգ (=հոգի) եւ գաղափարաբանութիւն (=ինտելեկտ կամ ոգի): Դրանց ամբողջութեան իւրաքանչիւր էատարր իր հերթին առանձին ենթատիրոյթների հաւաքականութիւն է. երկիրը՝ իրրեւ բնակլիմայական, Ֆիզիկաաշխարհագրական ամբողջութիւն, էթնոգենէզը կամ ազգի ծագումնաբանական հիմքը՝ ազգային հոգեբանութեան, կրօնական-բարոյարանական ըմբռնումների, ժամանակի (պատմութեան) եւ էթնիկ ինքնագիտակցութեան ամբողջութիւն, իսկ ոգին կամ ազգային գաղափարաբանութիւնը, որ առաջին երկուսի հետեւանք է՝ լեզուի, մշակոյթի ու ազգային գոյափիլիսոփայութեան ամբողջութիւն: Ընդ որում, ազգային գոյութենականութիւնը անխուսափելիորէն պայմանաւորուած է այս երեք էատարրերի ներդաշն միասնութեամբ: Այս երեք էատարրերից որեւէ մէկի բացակայութիւնը խախտում է ողջ համակարգը՝ յանգեցնելով քայքայման, կործանման:

Հայաստանի բնանկարը պարզաբանում է էթնոսի գոյափիլիսոփայութիւնը, որ անմիջապէս խտացուած է լերան՝ «տնտեսապէս անօգուտ» Արարատի սիմվոլում՝ իրրեւ բացարձակ գոյ, յարակայութեան ու աստուածային նախասկզբի խորհուրդ, քանզի ենթագիտակցական «յայտնատեսութեամբ» ընդունուել է, որ «իր հոգեկան աշխարհի հիմ-

քը միայն լերան հաստատուն կայունութիւնը կարող է ձեւաւորել, որ մրրիկը գլուխը պատռում է ժայռի դէմ, որ դարերը արեւի ետեւից վազող դժբախտ որսորդներ են, ... որ էականը լինելն է եւ ոչ լինելիութիւն ձեւացնելը»<sup>4</sup>: *Եւ Ջարեանը, որպէս հմուտ պատմիչ, առասպելաստեղծում է հայրենի լեռնաշխարհի աշխարհագրութիւնն ու բանահիւսումնրա բնութիւնն ըստ տարուայ եղանակների՝ այդ կերպ ամբողջացնելով հայոց դիցավէպի տակաւին չգրուած էջերը...*

Հայկական լեռնաշխարհի մերկ ու կոշտ, «բիրտ» ու «խստադէմ», առաջին հայեացքից վանող բնութիւնը՝ լեռան, լճի ու աղբատիկ դաշտավայրի անմեկնելի ներդաշնակութեամբ, կախարդական երաժշտութեան ելեւէջների մի համանուագ է յուշում, որ հաղորդակից է դարձնում մահկանացուն տիեզերքի անանուն ու անվերժանելի գաղտնիքներին՝ կերտելով ոգի, կենսափիլիսոփայութիւն, ազգային հոգեբանութիւն, եւ, ի վերջոյ, պատմափիլիսոփայութիւն. «Փնշպէս Եգիպտոսը, Հրէաստանը, Յունաստանը եւ Էտրուսկների աշխարհը, Հայաստանը եւ ունի իր սրբազան աշխարհագրութիւնը, իր ամէն մի շրջան հանդիսանում է իբրեւ խորհրդանշանը իր ոգու մտաւորատան եւ անդրերկրային վայրերի»<sup>5</sup>: *Եւ մինչ Թրակիայի լեռնային բարձունքներից յուսական աստուածները իջնում են՝ «իրենց հետ բերելով բանաստեղծութեան, օրէնքների եւ սրբազան արուեստների գերագոյն ուրիշը»<sup>6</sup>, հայերն իրենց «առնական աստուածների հետ» բարձրանում են Արարատ, Արագած, Գեղամայ լեռները՝ «աշխարհիս ամենաանապատային, ամենամեծակեաց եւ ամենարեւային վայրերը»<sup>7</sup>: Այստեղ են նրանք կերտել իրենց պատմութիւնը, ճանաչել աստուածների ոյժն ու կամքը, գայրոյթն ու սէրը, վերժանել ու հասկացել «աստղերի գերագոյն կշռականութիւնը, տիեզերքի կառուցողական ուրիշը եւ անհունի ներուժ լինելիութիւնը»<sup>8</sup>, յօրինել հանճարեղ ստեղծագործութիւններ՝ հաստատելով պայքարի եւ ոգեղէն էութեան իրենց գերագոյն օրէնքը:*

Այստեղ՝ Հայաստանում, լեռն ամէն քայլափոխի խոյանում է վեր եւ փակում հորիզոնը, պարսպում ճանապարհը՝ այն տպաւորութիւնն ստեղծելով, թէ «պահուրտուք է խաղում»: Բայց եւ «կաղապարում», «սահմանափակում» է մարդկային ոգու թռիչքը, նեղացնում հայեացքը՝ երկնքից իջեցնելով երկիր, «պարտադրում նախապատրաստուած ձեւեր», զրկում մարդուն ազատութիւնից, դանդաղեցնում ու ծանրացնում նրա մտքի ընթացքը: Իսկ ահա դաշտանկարը, որ առաջին հայեացքից անբնական է թւում ամալի իր տեսքով ու աղբատիկ բուսականութեամբ, անակնկալի է բերում յայտնութեան տարերայնութեամբ, քան-

գի «քանդուած երագների եւ մեծադորդ պոեմաների հետքեր է պահում իր կոտրուած եւ սլացիկ գծերի մէջ»<sup>9</sup>: Դա հոլանդական դաշտանկարը չէ՝ մեղմ, խնամուած, համաչափ, գունային ներդաշն ու նրբին անցումներով կարգաւորուած: Դա վայրի, կտրուկ ճեղքումների, կատաղի ու գոռ խոյացումների, վառ ու խռիւ գոյների՝ անհասկանալիորէն հմայիչ, տարերային մի խառնուրդ է, որ աղաղակում է իր խաղաղ լուսթեամբ՝ յուշելով, թէ «կեանքը այնքան ներսն է, որ ամէն ինչ բարձրանում է եւ գագաթի վերածուում»<sup>10</sup>:

«Ամէն մի երկիր,- խորհում է Զարեանը,- ունի իր հիմնական գաղտնիքը, որ դժուար է, անկարելի է հասկանալ, բայց որի հետ պէտք է հաղորդակցութեան մէջ լինել»<sup>11</sup>: Առաջին հերթին սա վերաբերում է Հայաստանին, որի գոյութեան առեղծուածը եթէ անկարելի է բացայայտել, ապա գոնէ հնարաւոր է ճանաչել: Իսկ այն ճանաչելի է առաջին հերթին իր աշխարհագրական դիրքով, սահմաններով, բնակլիմայական առանձնայատկութիւններով, ուր գոյաւորւում, ամբողջանում եւ զարգանում է մեր պատմութիւնը: Եթէ Սարգարապատը նման է Խորենացուն՝ առեղծուածային, առասպելական, այլարանական ու «վառ», ապա Արարատեան դաշտը նման է Մեսրոպ Մաշտոցին՝ անձաւում առանձնացած, «մումի պէս» լոյս արձակող: Այն իր ասկետիկ ջերմեռանդութեամբ, խոնարհ լուսաւորութեամբ ու փիլիսոփայական վեհութեամբ ստեղծել է ազգային անկրկնելի ոճը՝ սահմանելով «մեր տաղերի երաժշտականութիւնը, մեր ճարտարապետութեան ոգեղէնացած կառուցուածքը, մեր կարպետների ժուժկալ գունաւորումը եւ մեր լեզուի շարժուն հնչականութիւնը»<sup>12</sup>: Արարատեան դաշտավայրը, փիլիսոփայական իր կեցուածքով, փորձում է դաշնաւորել, միաձուլել լեռ եւ դաշտ՝ անյայտը, մրրկաշունչը, բարձրն ու «լուսթեան իմաստութիւնը»: Հեռուններում ձրգուող գունային ելեւէջների ընդգծուած Փոնի վրայ առանձնանում է լոյսերի մէջ ողողուած Արարատեան դաշտը, ուր լոյսը ո՛չ «թափառող պատահականութիւն» է, ո՛չ «պայքար», այլ՝ «խաղաղօրէն սփռուած, բիրեղեայ մի պարտէզի համայնատարած մի կայծկլտում: Դաշտ եւ լոյս՝ մի են: Երբ գիւղացին հերկում է հողը, նա իր բահի հարուածով դուրս է նետում նաեւ լոյսի մի կոյտ»<sup>13</sup>: Հայկական լեռնաշխարհի բարձրաւանդակին բազմած, գլուխը տիեզերական անհունի խորխորատները մխրճած՝ դաշտավայրը «մտածում է մի միտք», որ «մասն է անբոճնելի, խորհրդաւոր, ուրիշ մի կեանքի»: Նա ականջ է դնում անհասանելի հնչիւնների, որ պատմում են աստուածաշնչեան խորին խորհուրդներ:

Ահա թէ ինչու է Չարեանն այն անուանում է «միջոց»՝ «կրօնական տեսիլքին հասնելու համար»<sup>14</sup>։

Անկրկնելի է Արարատեան դաշտը լուսարացին՝ այնքա՛ն աստուածային եւ այնքա՛ն կատարեալ։ Ծեղքելով հորիզոնը՝ տիեզերքի նախակերտ լուսթեան անսահմանութեան մէջ Արարատը վեհօրէն բարձրացնում է իր ալեհեր գագաթը, աչքերն ու բազուկները կարկառում արեւի՝ դեռեւս «դժգոյն բոցերի խարոյկին», ապա «... սփռում է իր բուրվառի արծաթ կրակը մինչեւ Արագած», իսկ Գեղամայ լեռները, «ոսկէ փողերը երկարած», ողջագուրւում են ճերմակաթոյր ամպերին<sup>15</sup>։ Ամէն բան անէացած, ներձուլուած է բոցավառուող դաշտանկարին՝ ապահովելով պահի միատիկ խորհուրդը։ Մանրօրէն արթնանալով քնից՝ դաշտավայրը վրձնում է օրուայ անկրկնելի, պարզ ու հովուերգական կտաւը։ «Բաղերը, գարնանային օդի թրթռումի մէջ, իրենց արթնացնող յոյզերն են քաթախում։ Շարքով կանգնած բարդիները, կարծես արմատների մատների վրայ բարձրացած, աւելի հեռուն եւ աւելի բարձրն են ուզում տեսնել։ Արագիւնները, մտածկոտ նաւերի պէս, առագաստանման թետերի վրայ, սահում են։ Թռչունները երգում են։ ... Գրեթէ անամպ երկինքը լուսատրութեան մէջ սաւանացած է»<sup>16</sup>։ Իսկ իրիկնամուտին, օրուայ վաստակից յոգնարեկ, ամէն բան անշարժանում է, ձուլւում հորիզոնի կապոյտին, եւ թւում է՝ դաշտավայրը «կանգ առած ծով» է՝ անհուն, ներսոյգ, լռին, որ պարփակում է «կրօնական վեհութեան մի անբացատրելի շունչ»։ Ամէն բան գեղեցիկ է եւ «մտածում է։ Մտածում է մի խոր եւ անբացատրելի միտք, որը կարծես մարդկային էութիւնից էլ դուրս է, վեր է, որը աւելի է քան պարզ լինելութիւն, միակողմանի կեանք, յոյզերի եւ զգացումների բարդ մի սիստեմ-նշան է, վերյիշում»<sup>17</sup>։ Իսկ այս համատարած անդորրութեան մէջ անլսելի հնչիւններից հիւսուած մի համանուագ է ղօղանջում՝ աւետելու Արարատի վեհափառ մենութիւնը։ Այն տպաւորութիւնն է կազմւում, թէ ողջ դաշտավայրն ու հեռուներում ձգուող գիւղերը մասնակցում են «տարօրինակ մի պատարագի»... Այստեղ պիտի փնտռել հայկական լեռնաշխարհի ոճն ու էութիւնը, քանգի այստեղ է, ըստ Չարեանի, ուխտաւորում տիեզերականի ու երկրայինի միաւորման բանաստեղծութիւնը։

Մի առիթով Չարեանն այն միտքն է յայտնել, թէ ծովի հետ ունեցած յարաբերութեամբ կարելի է բնութագրել ազգն ու նրա բնակած երկիրը։ Եթէ հայ ազգը «կուլտուրապէս, ծովի եւ լեռան երկու հակադիր սկզբունքների պայքարով» է ապրել, ապա Հայաստանն այս իմաստով բացառիկ համադրութեան պատկեր է. «Մեր երկրում, նաւարկելու համար

լեռ պետք է բարձրանալ», որովհետեւ «մեր ծովերը երկնքի մօտ են»<sup>18</sup>։ Այստեղ է մեր գոյութենականութեան եւ պատմութեան հակասականութեան ողբերգութիւնը։ մեր նախահայրերը իւրօրինակ լուծում են տուել անհրաժեշտութեանն ու իրականութեանը, երբ «ծովերը եզերող լեռների վրայ կանգ են առել, խրխնջող ձիերի վրայ բազմած»։ Ահա թէ ինչու գրողի համար Սեւանը գրեթէ նոյնական է լեռանը՝ «խոր, ինքն իր մէջ բաշուած, խորհրդաւոր, լեռան նայուածքով»։ Պատճառն այն է, որ երկնքի այդ կտորն իջել է երկիր՝ լեռներով շրջապատուած, լեռների գագաթներին իջած ամպերի նման՝ հրելով «բոլոր հորիզոնները»։

Ըստ Զարեանի, ինչպէս Արարատեան դաշտավայրը, այնպէս եւ Սեւանն ունի իր «խորհուրդների բանալին», որ միանգամից չի յայտնարերւում, այլ մտքի եւ ճաշակի ճիգ ու կարողութիւն է պահանջում։ Սեւանն էլ տարածւում է մեր աչքի առջեւ որպէս «անծայր մենակութիւն»՝ այն տպաւորութիւնն ստեղծելով, թէ հեռու-հեռուներից է եկել, տիեզերքի անյայտ խորքերից՝ իրական աշխարհի եւ անտեսանելի-անիրական աշխարհների միջեւ կապ ստեղծելու առաքելութեամբ։ Չնայած առաջին հայեացքից աղքատիկ թուացող տեսքին՝ միեւնոյն ժամանակ «բացուած գրքի նման պարզ է եւ խոր, մեծակ է եւ բարդ, դիրքը բնական է եւ արտասովոր»։ Այստեղ իրենց հետքն են թողել բնութեան տարերքներն ու ազգային հանճարի՝ ձեւի մէջ անպաճոյճ, բովանդակութեան մէջ խորունկ ու կատարեալ խոյանքները։ Այդ հոյակապ ու «թագաւորական» տեսարանին աւելանում է կապուտակ ջրի՝ արեւի բարկ ճառագայթների, քամու, հովի ու փոթորկի տեղապտոյտներից կազմուող գունային թրթիռների անստգիւտ համանուագը՝ իր հերթին մասնակից դառնալով «ամպերի կուտակումներին, անցնող հովերի եւ ցնցոտող լոյսերի գունաւետ քանդակումին»։ Սեւանը համատիեզերական տեսիլքի ու ազգային յայտնատեսութեան բանալին է, իսկ Սեւանայ կղզին, իր ընդգծուած ճգնակեաց կեցուածքով, «ներքին, ներուժ երաժշտութեամբ», պահպանում-ամփոփում է ազգային ոգու, ինքնութեան ու սարսուռների յուզավառ տենդն ու նուիրական յիշատակները։

Ընդհանրացնելով Հայաստանի աշխարհագրութեան վերաբերեալ իր սահմանումը՝ գրողը գիտում է, թէ «Մեր երկիրը դաժան է եւ անողոր։ Նրա ամենի, ժայռոտ լեռները, նրա ողբերգական անապատները, նրա անհորիզոն, իր մէջը կծկուած, խստադէմ կեցուածքը, նրա ծանր լոռքիւնը խածել են մեր սիրտը եւ ուղեղը, կասեցրել մեր թափը եւ ծանր կապարի տակ ճգմել մեր բոխքը։ ...Աշխարհից հեռու, ամայի այս բարձրաւանդակի վրայ՝ մենք բուք ենք հերկում եւ հեղեղ ցանում»<sup>19</sup>։

Իսկ որպէսզի ամբողջանայ իր պաշտելի երկրի կատարելութիւնը, Չարեանը բանահիւսում է Հայոց լեռնաշխարհում տարուայ եղանակների գեղարուեստական պատկերը, նրան վերագրելով ազգային բնաւորութեան յատկանիշներ: Գարնան խորհրդանիշը Չարեանի համար Նորքի ստորոտում ծաղկած նշենիներն են... Իսկ գարունը Հայաստան է ներխուժում անակնկալ ու միանգամից. «Եռացած լալայի նման ամէն կողմից պոռթկում է: Նայիրեան աշխարհը մոգական շնչի տակ արթնանում է... Հայաստանը դառնում է հնչուն մի երգ»<sup>20</sup>: Արեւից ջերմացած աշխարհը միանգամից զարթնում է, հալոցքից ձիւնը վարարում, հեղեղում, ապա ճամփայ է հարթում իր համար, սերմը շունդայից պայթում է հողում, իսկ օդի մէջ տարածւում է խոնաւ մի բոյր՝ ծաղկած ծառերի, ձնծաղիկի ու մանուշակի նրբին հոտերով շաղախուած, եւ բնաշխարհը «գունաւոր հրդեհ» է յիշեցնում: Ամռանն արեւը խենթացնելու չափ դաժան է՝ բարկ ճառագայթների՝ միանգամից տեղացող գրոհի պատճառով, իսկ աշունը՝ երկարատեւ, մելամաղձիկ ու «մոգական»: Այստեղ թրթռուն լոյսը մեղմ ճեղքում է օդը եւ թափանցում կանաչկարմրադեղին-շագանակագոյն երանգների արանքից, իսկ երբ մեղմ լալիս է անձրեւը՝ մարգարտէ արցունքներ շաղ տալով հրաշէկ անտառներին, ոսկէ լեռներին ու «բոցանման վարսերով» Արարատեան դաշտին, քամին մե՛ղմ սուլում է իր «պսպղուն տերեւաթափի լեզգիկական»:

Չմեռը Չարեանի մտապատկերում անողոք բռնակալի պէս է մրտնում Հայոց լեռնաշխարհ: Սառնաշունչ քամին խենթացած սուլում է, մատները ծխնելոյզների մէջ մտցնում, թռչում լեռների վրայով ու ձորերի միջով, ապա խուլ հեծեծանքի արձագանգներ արձակելով՝ հանգրուանում դաշտերում: Առատ տեղացող ձեան խոշոր փաթիլները, երբեմն ծանր-ծանր, երբեմն յուշիկ ու թեթեւ նազանքով, օրօրուելով՝ ձմռան հեքիաթն են հիւսում՝ Հայոց աշխարհն առնելով համատարած ճերմակի տակ: Փակւում են բոլոր ճանապարհները, եւ որոշ բնակավայրեր տարուայ կէսը մնում են չըջափակուած, աշխարհից մեկուսացած՝ շարունակելով ապրել նախահայրերի աւանդած սովորոյթով, ինքնամփոփ կենցաղով ու կեանքով: Եւ, այնուամենայնիւ, ձմեռը Չարեանի մտապատկերում նոյնանում է Մննդեան տօների հեքիաթին, երբ ողջ երկիրը, չնայած սաստիկ սառնամանիքին, համակւում է մեծ ջերմեռանդութեամբ ու վառ հաւատով...

Հայոց բնաշխարհի առասպելը Չարեանը խտացնում է Հայր Աւետիսի Այլիանի կերպարում: Ամէն օր աղամամութիւն նրա հոգին թեւածում է Սուրբ Ղազարի շուրջը, մասնակցում առաւօտեան ժամերգութեանն ու

չարականների երգեցողութեանը, մոմ վառում, աղօթում, իսկ արեւածագից յետոյ լքում կղզին՝ շարժուելով դէպի երբեք չտեսած իր հայրենիքը: Այստեղ նրա տեսիլքն առասպելական քահանայի տեսքով վերածուում է բանահիւսութեան, որ շուրթից շուրթ տարածուում է ողջ Հայաստանում, ապա կէսգիշերից յետոյ, երբ «Սուրբ Ղազարի բոլոր լոյսերը մարում են եւ նոճիները, բարձր ուրուականների նման, ցցում են միայնակ. երբ վանականները կողպում են իրենց դռները եւ մտնում անկողին... գրադարանի այն մասի պատուհանը, ուր պահուած են ձեռագրերը, վայրկենապէս բոցավառում է եւ անմիջապէս մարում», վերադառնում է հայր Ալիշանը եւ շարունակում իր ընդհատած աշխատանքը<sup>21</sup>: Հայի ազգային ոգու հանրագիտարանն էլ Արովեանի Վէրք Հայաստանի պատմավէպն է, ուր խտացուած է հայոց պատմութեան նորօրեայ դիւցազներգութիւնն ու առասպելակերտումը. «Արովեանը որ մեծ բանաստեղծ է, էպիկական վէպը կառուցել է հայ տան նման աղքատ, ոտքերը գետնի տակ մխրճած, ցեխով, քարով եւ թրիքով շինուած նիւթերով: Բայց ներսը հրաբուխ է, իսկական դիւցազներգական թափ ու թռիչք»<sup>22</sup>: Ահա թէ որտեղից է սկիզբ առնում հայի երեւոյթը եւ որտեղ պիտի փնտռել նրա առասպելային պատմութեան, տեւականութեան ձգտող կենսագրութեան, ազգային ինքնագիտակցութեան ու հոգեկերտուածքի ակունքները:

Եթէ, ըստ Հ. Թէնի<sup>23</sup>, իւրաքանչիւր ժողովուրդ կրում է իր բնական երկրի ազդեցութիւնը՝ ձեւաւորելով իր ազգային գոյափոխոսփայութիւնը, ապա, ըստ Թ. Բոքլի<sup>24</sup>, երկիրն էլ, իր հերթին, հետեւանք է սեփական պատմութիւնն արարչագործող էթնոսի գիտակցութեան: Հայ ժողովրդի եւ Հայաստանի պարագայում անհրաժեշտ է յաւելել պատմութեան գործօնը, որ Չարեանը դիտարկում է «յանուն ազատութեան» պայքարի եւ մշակութային ամբողջացման ճիգերի համատեքստում՝ իրրեւ ազգային անհատականութեան՝ ինքնութեան հաստատում, ներկայի ու ապագայի կերտում: Հայ ժողովրդի պատմութեան փոխոսփայութեան իր ընկալումը, թէեւ հպանցիկ, գրողը սահմանում է՝ գուգահեռելով Ֆիխտէի<sup>25</sup> Ֆրանսիացիների ու գերմանացիների պատմութեանը տուած գնահատականը մէջբերելով. «Ֆիխտէն գրել է. «Ֆրանսիացիները միայն պատմական ես-ով են օժտուած, մինչ գերմանացիները բնագանցականով»: Հայ ժողովրդի ամբողջ ճիգը, բոլոր պայքարները ձգտել են իր բնագանցական ես-ին տալ պատմական ձեւաւորում: Իր ես-ը արդարացնել պատմութիւնով»<sup>26</sup>: Ահա թէ ինչու հայ իրականութիւնը գրողը քննարանում է պատմութեան համատեքստում: Ներկան

անցեալի արդիւնք է, իսկ վաղը, ապագան կերտում է ներկայում: Ուստի անհրաժեշտ է ճիշտ գնահատել անցեալը, տեսնել ու ճանաչել սխալները, որպէսզի ներկան գերծ մնայ դրանցից: Եթէ երկրի բնաշխարհը պարզում է դրոյթը՝ փիլիսոփայօրէն ընկալելի եւ կատարեալ, ապա իրականութիւնը հակադրոյթն է, որ ուղեկցում է պատմութեան գուգահեռումներով, ինչու է՝ երբեմն էլ սեփական փորձի եւ անձնական ապրումների օրինակով: Պատմութեան պարադոքսը շարունակում է ապտակների իր թատերախաղով ապշեցնել մեզ, իսկ մենք, արդարութեան յաղթանակի միամիտ հաւատով, դեռ անտեսում ենք շահերի բախման մարտավարութիւնը. «Ամերիկացի մեր պրոֆեսորները տաճկերէն են սովորում: Այնտեղ, ուր հողը արիւն է ծծած, ամերիկացիները ներկայ են, որովհետեւ արիւնոտ շրթերի տակ անշուշտ նախ կայ»<sup>27</sup>: Մա հայ իրականութեան եւ հայոց պատմութեան նորօրեայ «Ողբ»ն է, որի ենթատեքստը հետամուտ է ազգային ինքնագիտակցութեան վերագարթօնքի գերագոյն նպատակի իրականացմանը եւ որին «մօտենայ պարզ նայուածքով, անկարելի է»: Ջարեանը գտնում է, որ հայ իրականութիւնը մշտապէս երկփեղկուած է եղել հակասական, ընդոծին գաղափարախօսութիւնների, իսկ հայ իմացականութիւնը՝ մարմնի եւ հոգու, նիւթի եւ հոգեւորի իրարամերժ ըմբռնումների միջեւ: Հայր պատմութիւնից դասեր չի առել, չի ըմբռնել եւ չի գնահատել սեփականը, հարազատը, չի կարողացել, չի ցանկացել պեղել-յայտնարեբել միաւորման ազգային ուղին, երբեւէ չի ձգտել ներդաշնակ կեանքի, չի դիմել սեփական յիշողութեանը, արեանն ու սրտին, մշտապէս խաբուել է եւ համակերպուել, երբ դեկը ստանձնել են օտարի աչքերը, սիրտն ու միտքը «փոխառած» իմաստակները, իսկ վերածննդի ջահակիրներն այն յանձնել են Երագին...

Ջարեանը հայ իրականութիւնը քննարանում է՝ դիտարկման ոլորտ ներառելով թէ՛ Սփիւռքը եւ թէ՛ Խորհրդային Հայաստանը: Սփիւռքեան իրականութիւնն այն տպաւորութիւնն է ստեղծում, թէ «կարծես ոչինչ չի փոխուել, այլ ամէն ինչ տեղափոխուել է միայն», իսկ հայրենիքի գոսցումը ոչ թէ «հոգեկան ուրոյն արժէքով օժտուած եւ տիեզերական կեանքի մէջ իր որոշ աշխարհագրացումը բերելու կոչուած մի ստեղծագործող ազգի բնակավայր, այլ ինչպէս շատ հող, մեծ տարածութիւն ու հարստութիւն ունեցող նիւթական պահանջ» է<sup>28</sup>: Իրականութեան եւ ներկայի գգացողութիւնն իր տեղը գիջել է «խաբուսիկ ու կեղծ» երազներին. դպրոցը, մամուլը, կուսակցութիւններն ու այլ ազգային հաստատութիւններ «ազգային կամ կրթական գործերով զբաղւում են իրենց կեղտը ծածկելու», գուտ գաղափարական ուղղութիւնը

պահելու համար՝ իրրեւ «ընդհանուր սկզբունքների արտաքին քաղաքակրթական ձեւ եւ հասարակական անհրաժեշտութիւն», իսկ հոգեւոր խաւը դարեւր շարունակ ազգային ինքնագիտակցութիւնը սահմանափակել է սքոլաստիկ ու դոգմատիկ կրօնահայեցութեամբ՝ տուրք տալով ձեւապաշտութեան եւ նոյնիսկ նիւթապաշտութեանը՝ բնաւ չմտահոգուելով «հայ մտքի կրօնափոխոփայական սահմանները... ընդլայնելու, խորացնելու» անհրաժեշտութեամբ: Մտաւորականութիւնն էլ, իր հերթին, օտարամոլ է, քաղքենիական իր հոգեբանութեամբ կեղծ հայրենասիրութիւն է ծախում՝ հմտօրէն քողարկելով փառատենչութեան, նախանձի ու վաճառականի ստորակարգ բնագոյները: Այս առումով միանգամայն հետաքրքրական են, թէ եւ ոչ անկողմնակալ, «Համազգային»<sup>29</sup> հետ կապուած գարեանական գրառումները, միանգամայն ուշագրաւ՝ գրողի կատարած դիտարկումներն ու հետեւութիւնները էթնոհոգեբանութեան տեսակէտից. «Այստեղի վաճառականները եւ նրանց ոտքերը լգող այդպէս կոչուած մտաւորականները երկու ֆրանսացի գրագէտներ բերած են, որոնցից մէկը հայի օգնութեամբ Նարեկացուց կտորներ թարգմանած է: Սրանք թէ՛ mi pakhali<sup>30</sup>: Ահագին ծախսեր են անում, միասին լուսանկարում, թերթերում հրատարակում եւ այլն, իսկ ի՞նչ պիտի լինէր, եթէ Նարեկացին ինքը ողջ լինէր. այդ սրիկաները անօթի պիտի թողնէին նրան եւ պիտի աշխատէին նրա շուրջը լոռիսն ստեղծել, որպէսզի նրա մեծութիւնը շուրջ շոգի իրենց վրայ»<sup>31</sup>:

Տարագիր գրողն առաւել ընդգծուած է զգում իր միայնութիւնը, մերժուածութիւնը՝ առաւել եւս, երբ լուծեան է մատնուում կամ շրջանցուում են նրա վաստակն ու անունը: Այլեւս հասկանալի է, թէ ինչու հայութեան հետ իր շփումը նա գրեթէ նուազագոյնի է հասցնում՝ շարունակելով ապրել ու ստեղծագործել բոլորովին մի այլ եւ միանգամայն ինքնարաւ աշխարհում. «Այլեւս ոչ մի հայ թերթ չեմ տեսնում, եւ հայերը թաղուած են հեռաւոր մշուշում... Միակ իրականութիւնը իմ յղացումս է՝ աշխարհ աշխարհում»<sup>32</sup>:

Զարեանի դիտարկմամբ Սփիւռքը մերժում է «համայնալարական» Հայաստանը, իսկ վերջինս էլ՝ «բուրժուա» մտայնութեամբ սողորուած սփիւռքահայութեանը: Եթէ գաղթօջախներում հայն ուժացման վտանգի առջեւ է կանգնած լեզուի, հայրենիքի, յիշողութեան կորստեան պատճառով, ապա Խորհրդային Հայաստանում «եղբայրութեան» եւ ինտերնացիոնալիզմի գաղափարախօսութիւնը ինքնառոչնչացման է տանում ողջ ժողովրդին: Ժխտման, իւրացումի, համահարթման ու պիտակաւորման մաղձոտ մթնոլորտը մոռացութեան է մատնում ազգայինի

ցանկացած գրսելորում՝ ազգային գիտակցութիւն եւ հոգեբանութիւն, պատմութիւն, արժէքներ: Գաղափարախօսութեան մոլեռանդ ջատագովութիւնը պարտադրում է գրականութեանը, գիտութեանը, արուեստին՝ սահմանելով իր ձեւն ու բովանդակութիւնը, սահմանափակելով արուեստագէտի եւ մտածողի ազատութիւնը: «Մտաւորականութիւնը», աղճատուած դիմախաղով, այլափոխել է իր դէմքը, աղճատել էութիւնը եւ պատրաստ է վաճառել նոյնիսկ հոգին: Կարող ուժերը կա՛մ յարմարում են՝ պահպանելով չէզոքութիւնը եւ խօսելով ենթատեքստում, կա՛մ երթարկւում են պարտադրուած օրենքներին եւ կորցնում մտքի ու զգացմունքի անկեղծութիւնը: Չկայ մի լուսաւոր կէտ, խաղաղ մի հանգրուան, որին հնարաւոր լինի փարուել կամ որից հնարաւոր լինի կառչել: Գոչելու, ապրելու կենսարանական բնագոյր կանգ չի առնում եւ խորականութիւն չի դնում միջոցների միջեւ՝ ձեռք բերելով ու ցուցադրելով հոգեբանական բոլորովին նոր մի երանգ՝ անծանօթ ու զագրելի: Դա «որբի», խեղճի հոգեբանութիւնն է, որ գրողի համար միանգամայն մերժելի է ու պախարակելի, բայց միաժամանակ հասկանալի է, ուրեմն՝ ներելի: «Զարուքա՛նդ իմ հայրենիք, կոպիտ, անտաշ, սրիկայացած իմ հայրենիք»<sup>33</sup> ... Այս իմաստով յատկանշական է «Նաւատումար Թիւ 20» խորագիրը կրող օրագրութիւնը<sup>34</sup>, ուր հայ իրականութիւնը գրողը զուգահեռում է Բաքուի փողոցներից մէկում դեռ մանկութեան տարիներից յիշողութեան մէջ դրոշմուած մի միջադէպի հետ, երբ խենթերի նմանուող ամբոխը «Մեշեղիի՞՞ թէ Ալիի անմիջական» ժառանգորդները պահանջում էին իրենց բաժին հարստությունը, քանի որ իրենց համարում էին «առաքեալի մաքրամաքուր արիւն»ը կրողներ<sup>35</sup>: Հայի հոգեբանութեան մէջ արմատացած պահպանողականութիւնը, մանրախնդրութիւնը, երկրորդականը գլխաւորից տարրերակել չկարողանալու եւ առաջինին նախապատուութիւն տալու, չգիջելու եւ սեփական տեսակէտը պնդելու յամառութիւնը, Չարեանի կարծիքով, ծայրայեղութեան է հասնում իր բոլոր գրսելորումներով, բոլոր՝ բնագաւառներում՝ մանաւանդ եթէ խոչընդոտում է ազգային միասնականութեան եւ իդէալին հասնելու ճիգերը: Ու դա ոչ թէ այն պատճառով, որ փորձում է պահպանել ազգային փշրուած բեկորները, այլ որովհետեւ այդպէս է սովոր եւ այդպէս է պահանջում նրա փոքրիկ եսի չնչին մղումը...

Ահա թէ ինչու գրողի մտապատկերում այդ իրականութիւնը նմանում է դժոխքի, որը նա այլաբանում է Միքելանջելոյի համանուն որմնանկարից ստացած տպաւորութեամբ: Դժոխքի նախատիպն, ըստ Չարեանի, Միքելանջելօն փոխառել է Պղատոնից, իսկ վերջինս՝ Հայաստա-

նից: Տարիներ անց վերջնականապէս Հայաստանում հաստատուելուց յետոյ էլ գրողը համոզուում է իր տեսակէտի ճշմարտացիութեամբ՝ անմիջականօրէն գուգորդելով այն անձնական ապրումներով: Այդ են վկայում 1964ի օրագրային գրառումները, որոնք առաջին հայեացքից թէեւ խիստ անձնականացուած են երեւում, սակայն ենթատեքստում ընդհանրական են եւ առաւել քան խօսուն<sup>36</sup>: Ապա Ջարեանը այլարանում է նաեւ Դանթէի, Չելինիի կենսագրական օրինակներով. ««Գտայ, - ասում է Դանտէն Կանդիտի Պալային ուղղուած նամակում, - իմ դժոխքի օրինակը այս երկրում, ուր ապրում ենք»<sup>37</sup>: «Գիշերները անկողնում կարդում եմ Բենվենուտո Չելինիի յիշողութիւնները, որ մասամբ արտացոլում են Վերածննդեան շրջանի կեանքը Իտալիայում: Դաւասիրութեան, ծածկահնարքների եւ դաւաճանութիւնների ինչպիսի խառնուրդ... Եւ սակայն, ինչքան մօտ եւ ինչքան նման»<sup>38</sup>:

Գրողի քննադատութիւնը, իրականութեան խարագանումը ոչ թէ Հայրենիքի մերժման կամ արհամարհանքի հայեացք է, այլ ջերմ սիրոյ, այն կատարելութեան բարձունքներում տեսնելու լուսաւոր հաւատ: Այդ է պատճառը նաեւ, որ գրողն իր գրառումներում մշտապէս գուգահեռներ է անցկացնում հայի եւ այլ ազգութիւնների, Հայաստանի ու այն երկրների միջեւ, ուր ժամանակաւոր բնակութիւն է հաստատում: Պատահական չէ, որ օրագրութիւններից շատերը վերնագրուած են որեւէ երկրի, քաղաքի, աշխարհագրական միաւորի անունով՝ «Հոլանդական Տպաւորութիւններ», «Հոլանդական Յուշատետրից», «Հոոմէական Յուշատետրը», «Ասիգի», «Արարատեան Դաշտում»<sup>39</sup> եւն.: Այսպէս Հայաստանը հակադրուում է Հոլանդիային, հայկական քաղաքակրթութիւնը նոյնացուում միջերկրական քաղաքակրթութեանն իր «ոգու բարձրութիւններով», հայն էլ գուգահեռում յոյնին, հոլանդացուն, իտալացուն, ռուսին:

Հային բազմատեսիլով յոյնի հետ, Ջարեանը գտնում է, որ ի տարբերութիւն մեզ՝ յոյնը, անգամ օտարութեան մէջ, մշտապէս մտահոգուած է սեփական երկրի ապագայ հեռանկարով՝ իր հոգում մշտապէս վառ պահելով հայրենիքի գգացողութիւնը, ուր կեանքը հաւասարակշռուում է ամէն քայլափոխի վեր խոյացող հնազոյն մշակոյթի գլուխգործոցներով, ուր դեռ կենդանի են հին աստուածները, հերոսներն ու ոգիները՝ «իբրեւ բնական մթնոլորտի անմիջական արտայայտութիւն», ուր «փիթագորեան թուանշանները չափում են աստղերի պարը եւ պղատոնեան իտեաները ներդաշնակում են տարածութիւն եւ ժամանակ...»<sup>40</sup>: Այսօր էլ նա չի դադարում լինել Հելլադայի արժանի հետնոր-

դր, որովհետեւ նախնիներից ժառանգել է կեանքի, աշխարհի ու տիեզերքի արարման ուրոյն կրօնափիլիսոփայութիւն եւ ազգային գոյափիլիսոփայութեան հայեցակարգ. «Փիլիսոփան մերժել է պարապը տեսնել, աստուածները միշտ էլ ւաելի կենդանի եղած են, քան մարդիկ: Նրանց գերմարդկային բնոյթը ո՛չ խորհուրդ էր եւ ոչ գաղտնիք, այլ անդրերկրեայ իրականութեան մէջ դէպքեր ստեղծող եւ պատմութիւն կերտող ստեղծագործ ոյժ, յատուկ իմացականութիւն, լոզոս»<sup>41</sup>: Հոլանդացին հայից առանձնանում եւ տարրերւում է երկրաշինութեան հզօր կամքով, կանոնաւոր աշխատանքով ու տոկուն յամառութեամբ. «Չմշակուած տարածութիւն չկայ: Ամբողջ այս երկիրը մարդկային յարատեւ աշխատութեան, տոկունութեան, կամքի արդիւնքն է: Ոչ մի ւաելորդ ժեստ, ոչ մի խօսք, որ գնդակի նման իր նպատակին չպիտի հասնի: Դիտում են ժամերով եւ բաղդատում: Մեր դաշտերի խոպան հեռանկարները գայիս են ու կանգ առնում օտար այդ հորիզոնների ծայրին: Սարդարապատը քարացած ծովի նման ճնշում է հոգիս: Քանի՜-քանի՜ ճառեր, թերթեր, վայնասուն՝ երկու մղոն ճահիճ շորացնելու համար... Իսկ այստեղ՝ պաղարիւն ամենօրեայ պայքարը ծովի դէմ, սիստեմատիկ եւ բեղմնատր,... անշշուկ մարտնչումը բնութեան բոլոր ուժերի դէմ»<sup>42</sup>:

Միանգամայն ուշագրաւ են Իտալիայի եւ իտալացու մասին գարեանական դիտարկումները: Երկիրը գերազանցապէս ներկայանում է իրրեւ մտայնութիւն՝ համաշխարհային քաղաքակրթութեան պատմութեան իւրօրինակ խտացում, որ կրում է իւրաքանչիւր իտալացի իրրեւ արիւն եւ հոգու բնական պարզեւ. «Իմաստուն խանդավառութեան հոյակապ երկիրն է, որի արուեստը իր հողի հարստութիւնից է բխում: ... Իտալիան գերազանցապէս ժողովուրդ է եւ համաշխարհային, հող է եւ ոչ նիւթ»<sup>43</sup>: Սակայն իտալացու կրօնափիլիսոփայական ըմբռնումներն ու աշխարհընկալումը խորապէս հակադիր են հայկականին, քանզի «մարմնական է, նիւթապաշտ, մեծդին սիրող»: Ու թէեւ գրողին Իտալիան հոգեհարազատ է, սեփական տան նման, այնուամենայնիւ, անձնական համակրանքի զգացումը գիջում է ինչպէս դիտարկման անկողմնակալ հայեացքին, այնպէս էլ հայրենասիրութեան զգացումին: Առաւել եւս, երբ դրա առիթը կայ, եւ այդ առիթն ընձեռում են օտարազգիները. «...պապին ուղղուած մի նամակի մէջ, ուրիշ մի “խրթնաբան”, հոյակապ Լեոն Բլուան<sup>44</sup> ասում էր. «Իսկ գիտե՞ք, թէ ինչ է հայ ժողովուրդը. այդ այն ժողովուրդն է, որը ամբողջ մարդկութեան մէջ ամենախորհրդատր պատմութիւնն ունի»»<sup>45</sup>:

Արդէն նշուել է, որ եթէ Հայաստանի բնաշխարհի նախատիպը<sup>46</sup> կամ խորհրդանիշը Ջարեանը տեսնում է Ալիշանի կերպարում, ապա պատմափիլիսոփայութեան, ազգային ոգու ընկալման առումով նախատիպն Արովեանն է եւ նրա Վէրք Հայաստանին: Սակայն դա չի նշանակում, թէ գրողն ամբողջութեամբ կրում է Արովեանի ազդեցութիւնը, այլ նրա պատմահայեցակարգը աշխարհայեացքային եւ քաղաքական կողմնորոշման սեփական մեկնարանմամբ՝ պայմանաւորելով պատմափիլիսոփայութեան մշակույթ-քաղաքակրթութիւն տեսութեամբ: Եթէ Արովեանի քաղաքական կողմնորոշումը ռուսական է, ապա Ջարեանինը՝ հակառուսական, քանզի ռուսի հոգեբանութիւնը մակերեսային է, չնչին, առհասարակ որեւէ փիլիսոփայութիւնից, ուրեմն նաեւ ինքնագիտակցութիւնից զուրկ: Նա հեշտութեամբ կարող է իւրացնել միայն վաճառողի եւ վաճառուողի ստորակարգ բնագոյնը եւ էժանագին մտքեր-«Ռուսները դարերով յաղթական մուտքի են սպասել, Այա Սոֆիայի խաչի առասպելն են ստեղծել եւ ամբողջ մի փիլիսոփայութիւն, մի տեսակ համատիեզերական աշխարհահայեացք՝ սուրբ գրքի, վողկայի, մտրակի եւ ճգնատրութեան մի իտեալ»<sup>47</sup>: Հայի հոգեբանութիւնը, գոյափիլիսոփայական հայեցակարգն ու մշակութային շարժման պատմութիւնը տրամագծօրէն հակառակ են ընթացել եւ պիտի շարունակեն հակադրուել ռուսին: Դա է, ըստ գրողի, ազգային ինքնապաշտպանութեան միակ միջոցն ու միակ ուղին<sup>48</sup>:

Ազգային Ֆենոմէնի մեկնարանման նպատակով գրողը յաճախ է դիմում պատմութեան յիշողութեանը՝ իր խոհերը շողկապելով ցեղ, միթոս, ազգ, ազգային ոգի կատեգորիաներին՝ դրանք ուղղորդելով ազգային գաղափարաբանութեանն ու պատմափիլիսոփայական հայեցակարգի ամբողջականացմանը՝ իր անմիջական աղերսները մակածելով ժամանակակից փիլիսոփաներ Նիցչէի<sup>49</sup> կամապաշտական փիլիսոփայութեան եւ Շպենգլէրի<sup>50</sup> քաղաքակրթութիւնների պատմութեան տեսութիւնից: Շպենգլէրը Արեւմուտքի Մայրամուտը աշխատութեան մէջ համաշխարհային քաղաքակրթութիւնների պատմութեան կազմարանութեան հիմքում դիտարկում է ցեղ (race), ժողովուրդ (people), ազգ (nation) սուբստանցները, որոնց ածանցուած են լեզուն, արիւնը, կրօնը, արուեստը: Այս ամէնի ամբողջականութեամբ կազմարանում են ազգային ինքնագիտակցութիւնն ու ոգին: Ըստ այդմ էլ Շպենգլէրն ազգերը դիտարկում է որպէս նախաազգերի (նախամշակութային ազգեր), մշակութային ազգերի եւ Ֆելլահեան (յետմշակութային) ազգերի գերագոյն դրսեւորում՝ անշուշտ նախապատուութիւնը տալով եւ վեր դասե-

լով մշակութային ազգերին: Եթէ Առնոյդ Թոյնրին<sup>51</sup> ցեղի գլխաւոր յատկանիշ է համարում «վառ ընդզծուած հոգեբանական ու հոգեւոր որակները», որոնք քաղաքակրթութեան տանող գլխաւոր գրաւականներն ու յատկանիշներն են (Թոյնրին քաղաքակրթութիւն ասելիս նկատի ունի մշակոյթը)<sup>52</sup>, ապա ցեղը կամ ռասան, ըստ Շպենգլէրի, մարդկանց արիւնակցական կապով միաւորուած խմբակցութիւն է, մէկ ամբողջական մարմին, որը հակուած է միաւորուել կամ բնակութիւն հաստատել կոնկրէտ աշխարհազրական տարածքում՝ միաժամանակ ապահովելով կեանքի յետագայ շարունակութիւնը տիեզերական ժամանակում: Հետեւաբար՝ ցեղին բնորոշ է ճակատագիրը, ժամանակը, ձգտումը, իսկ նրա իղէալին՝ ծագումնաբանութեան պատմական ընկալումն ու կեցութիւնը. «Յեղը, - սահմանում է նա, - կոսմիկական է եւ հոգեւոր: Որոշ իմաստով այն փուլային է եւ իր բնոյթով պայմանաւորուած տիեզերական կապերով»<sup>53</sup>: Զարեանական հայեցակարգը շպենգլէրեան տեսութեան մատուցումն է հայ ժողովրդի պատմութեան փիլիսոփայութեան վերլուծութեամբ: Ըստ այդմ գրողն առաջադրում է պատմութեան որոշակի կառոյց՝ պատմութեան կազմաբանական փուլից (որում դեռեւս գտնուում է հայր) անհրաժեշտ է անցում կատարել մարդակենտրոն փուլ, երբ միմեանց իղէալականորէն շողկապւում են հասարակական ոլորտը, կենսոլորտն ու մտլորտը: Մարդը իր կեցութեամբ որոշակի նպատակի, գաղափարի իրականացմանն է հետամուտ: Վերջինիս շողկապուած է նաեւ կեանքի շարունակականութիւնը: Այդպէս են կազմաւորւում ցեղը, համայնքը, ժողովուրդը, ազգը, որոնք թէեւ առանձին-առանձին ընկալելի են, սակայն գրողը հակուած է դրանք ղիտարկել իրրեւ մէկ ամբողջականութեան հատարբեր: Յեղն ազգի գոյութեանականութիւնը կարգաւորող յաւերժական այն հիմնաուժն է, որով պայմանաւորուած է ազգային արժէքների (բարոյարանական ու կրօնական, մշակութարանական, լեզուական, յիշողութիւն, հայրենիքի-հողի զգացողութիւն) տեւականութիւնը: Այն կազմում է ցեղի բուն էութիւնը, լինելութեան կառոյցը, որ խորապէս կապուած է պատմութեան հետ. «Յեղը մեր իսկութիւնն է: Այն խորքը, ուր ամբարուած են բոլոր շինիչ կարելիութիւնները, սկզբնասկիզբ ուժերի բոլոր աղբիւրները, արժէքների բոլոր շերտերը: Յեղը մեր անսահմանութիւնն է: Լինելու եղանակը, գոյանալու ուղղութիւնը: ...Յեղը դարերով կազմաւորուած խորհրդաւոր այն գոյակերպն է, որ ընդունում եւ կանոնաւորում է մեզ շրջապատող տիեզերական ներկան: Պատմութիւնը արօրում է երկրի մակերեսը, ցնցում եւ շարչարում ժողովրդի մարմինը, սլանում, կորչում

փոշիների անպերում, բայց ցեղը մնում է: Նա այն բովանդակ քա-  
րայրն է, ուր դեռ եւ միշտ ապրում են դիւցազներգական քաջերը: Ու  
ցեղը հոգի է: Աշխարհը լուսաւորող ներքին արեւը: Հօգօրութիւնը, որ  
մասնակցում է տիեզերաշինութեան»<sup>54</sup>: *Իսկ լինելութեան իր հիմքը ցեղը  
յայտնաբերում է բնութեան մէջ, որի օգնութեամբ եւ որի միջոցով բա-  
ցատրում է գոյակազմութեան իր արմատները՝ դրանք վերակերտելով  
առասպելարանութեամբ, երբեմն տոտեմիստական մատուցմամբ, կրօ-  
նական տեսիլքների ու ծիսաարարողակարգերի միջոցով՝ այդ կերպ  
մշակելով ոչ միայն աշխարհըմբռնում եւ աշխարհայեացք, այլ նաեւ աշ-  
խարհի, Տիեզերքի ու ցեղակիցների (արիւնակիցների) հետ յարաբերուե-  
լու ուրոյն կառուցք: Յեղի ազատ գործունէութեան կարեւորագոյն մի-  
ջոց է հանդիսանում լեզուն, որով եւ ապահովւում, իրագործւում է ցե-  
ղի անդամների հաղորդակցութիւնը: Շպենգլէրն, օրինակ, լեզուն չի դի-  
տում իբրեւ ցեղից անտրոհելի, կարեւորագոյն եւ անհրաժեշտ անփո-  
փոխ էութիւն՝ հիմք, չնայած նրա համախմբող դերին ու նշանակութեա-  
նը: Պատճառն այն է, որ լեզուն պատճառական գոյացութիւն է: Զար-  
եանն իր գրառումներում, հրապարակախօսական ու փորձագրական ե-  
լոյթներում մշտապէս բարձրացնում է ոչ միայն լեզուի գործառոյթա-  
յին դերն ու նշանակութիւնը, այլ նաեւ անհրաժեշտութիւնն իբրեւ ցեղի  
հոգեբանութեան դրսեւորում. «Այն, ինչ որ անուանում ենք լեզու՝ մի-  
այն բառերով արտայայտուելու միջոց չէ, այլ արտայայտութիւնն է  
առհասարակ: ... Լեզուն մեր մարմնական եւ հոգեկան էութեան հետ  
անբաժան կապուած՝ իմաստների, ձայների եւ խորհրդանշանների  
վերածուած մի տիեզերք է: Նա անդադար գոյացող, մեռնող եւ վե-  
րածնող տարերային ոյժ է: ... Լեզուն ներկայ է մեր մարմնի ամէն մի  
մասում, մեր սկանուներքների մէջ, մեր ուղեղի ծալքերում, մեր զգայա-  
րանքների թրթռում լարերի վրայ, մեր բջիջների աճող եւ քազմապատ-  
կող կերպրնկալութիւնների խորքում: Եւ մանաւանդ լեզուն արիւն է:  
Իսկ երբ ասում ենք արիւն՝ ասում ենք հող, երկիր»<sup>55</sup>:*

*Լեզուն, յետագայում զարգանալով, դասակարգւում է երկու խմբե-  
րի՝ արտայայտութեան, երբ դառնում է ինքնարտայայտման ու աշխար-  
հի արտայայտութեան ձգտում, ներքին հոգեկան պահանջ, եւ հաղոր-  
դակցութեան, երբ հաղորդակցուելու, որոշակի էակի հետ շփուելու մի-  
ջոց է: Ուստի իւրաքանչիւր լեզուի բնորոշ են ինչպէս փոխանցելի կող-  
մեր, որոնք մենք կարող ենք սովորել մեր նախորդներից եւ փոխանցել  
մեր յետնորդներին, այնպէս էլ յատկանիշներ, որոնք անփոխանցելի են  
եւ մահանում են այդ լեզուն (յատկանիշը) կրողի հետ: Ահա այստեղ է,*

որ Շպենգլէրը կարեւորում է մարդուն՝ որպէս ցեղի անհրաժեշտ եւ անփոխարինելի տարրի, լեզուն կրողի եւ սեփական ճակատագիրը տնօրինողի<sup>55</sup>։ Չարեանական աշխարհայեացքում այս դրոյթն աղերսում է ազգային պատմափիլիսոփայութեան հայեցակարգին եւ ստանում մարդակենտրոն երանգներ։ Այստեղ է, ահա, բանաստեղծի բարձրագոյն կոչումը եւ այստեղ պիտի փնտռել նրա առաքելութիւնը. «... անջատ անհատի երեւակայութեան մէջ կարող է գումարուած լինել ցեղի այն հիմնական յատկութիւնը, որ մնացել է գաղտնի ուրիշների համար»<sup>57</sup>։

Ուստի լեզուն ոչ միայն գեղագիտական կատեգորիա է, այլեւ ցեղի էութիւնը բացայայտող, նրա տեւականութեանը սնունդ մատակարարող արիւնն ու ոգին։ Սա է «Լեզուն եւ Արիւնը»<sup>58</sup> էսսէի գլխաւոր դրոյթը, ուր գրողն իր հայեացքները բանաձեւում է լեզու-արիւն-ոգի անցումների ու դրանց ամբողջականութեան տարածքում։ Լեզուն ցեղի յիշողութիւնն է, ուր ամփոփուած է նրա հոգին։ Որքան բարձրարժէք ու կատարեալ, անպաճոյճ ու անկեղծ, անխառն ու «հնչուն» է յիշողութիւնը, փիլիսոփայօրէն նոյնքան ամբողջական, վեհ ու իմաստուն է հոգին. «Լեզուն արիւնն է՝ խառնուած հոգիով պեղուած հողերին»<sup>59</sup>։ Այս դրոյթը գրողը շտապում է ճշտել Միգէլ դէ Ունամունոյի<sup>60</sup> ասոյթով. «Լեզուն ոգու արիւնն է»<sup>61</sup>։ Նոյն գիտակցութեամբ է պայմանաւորուած հայի գոյափիլիսոփայութիւնն ու ոգու հաւաքականութիւնը, այն, ինչին առաջին անգամ մեզանում ձեռնամուխ եղաւ եւ իրագործեց Արուսեանը։ Լեզուն է այն նախահիմքը, որ գաղտնագրած պահպանում է երկրի բնական կարն ու նրա կազմաւորման նախնական ձեւը, իմաստաւորման փիլիսոփայական, տարբերային ու պոսթկուն խորհուրդներն իրրել ազգային էութեան գերագոյն արտայայտութիւն։

Շպենգլէրը եւ Չարեանը «ժողովուրդ» կատեգորիայի համար առանձնացնում են ազգային հոգեբանութիւնը, միաւորող մղումներն ու իդէալը՝ այն, յանուն ինչի յարատեւում, ինչի շուրջ համախմբուած է ժողովուրդը։ Գիտութիւնը նաեւ յաճախ նոյնացնում է կամ կողք-կողքի յիշատակում ցեղն ու ժողովուրդը՝ դիտելով որպէս ներձուլուած մարմնական ամբողջութիւն։ Մինչդեռ ժողովուրդն, ըստ Շպենգլէրի, հոգեւոր ամբողջութիւն է, որի անդամներին միաւորում է «մենք»ի զգացողութիւնը, այսինքն՝ ո՛չ լեզուական, ո՛չ պատմաքաղաքական-աշխարհագրական, ո՛չ կենսաբանական, այլ մէկ ուղղութեամբ նայելու եւ գործելու հոգեւոր մղումը։ Չարեանի համար ժողովուրդը հոգեւոր ու կրօնական հաւաքականութիւն է, որին բնորոշ է անկրկնելիութիւնը, սեփական դիմագիծը, ներաշխարհը, տիեզերքն ընկալելու եւ մեկնարա-

նելու ուրոյն միջոցը, որ թելադրուում է «հոգեկան ու մտային արքետիպերի» ազդեցութեամբ. «Ժողովուրդները բարոյական լեռներն են, զեղազիտական եւ կրօնական արժէքների մէջ արտայայտուած...»<sup>62</sup>: Ժողովուրդը մշտապէս ենթակայ է «նորոգութեան» եւ յատկապէս խորապէս շաղկապուած կեանքին, իրականութեանը, ժամանակին, որոնց «ռիթմը զգալու եւ արտայայտելու» հմտութիւնն ու կարողութիւնն էլ կազմում է ժողովրդի ճակատագիրը: Միայն այդ կերպ է հնարաւոր նրա յետագայ գոյութիւնն ու զարգացումը:

Ազգի տեսարանական-փիլիսոփայական իր սահմանումներում Զարեանը նախ եւ առաջ տարրերակում է երկու կատեգորիա՝ ազգային ոգի՝ այլ կերպ այն անուանելով միթոս, եւ ազգային գաղափարաբանութիւն: Առանձին-առանձին սահմանելով դրանք՝ նա ձեւարանում է հայ ժողովրդի ոգու պատմութեան փիլիսոփայութեան իր կոնցեպցիան, համակարգը ըմբռնումը:

Ըստ ազգերի կազմարանութեան՝ շպենգլէրեան տեսութեան, ազգ են կոչւում այն ժողովուրդները, որոնց բնորոշ են քաղաքաշինութիւնը, կոսմոպոլիտիզմը եւ որոնք իրենց ոճով պատկանում են մէկ մշակոյթի. «Ազգի կազմաբանութեան հիմքում, - ասում է Ծպենգլերը, - ընկած է իդէան: Ընդհանուր գոյութեան այդ հոսքում խորը կապ կայ ճակատագրի, ժամանակի եւ պատմութեան հետ»<sup>63</sup>: Եթէ ցեղն ու ժողովուրդը փիլիսոփայի կողմից սահմանւում են նախամշակութային, ապա ազգը, ձեւաւորելով մշակութային դարաշրջան, ինքնին նրա ներսում է եւ իրագործում է պատմութեամբ սահմանուած իր դերը, որն աւարտին հասցնելուց յետոյ վերածւում է յետմշակութային կամ ֆեյլահեան ժողովրդի: Պէտք է դիտել, որ ազգութեան գաղափարակիրը կամ ազգային գիտակցութեան կրողն առանձին անհատներ են, ուստի եւ պատմութեան առջեւ ազգութիւնը ներկայացնում է փոքրամասնութիւնը, առաւել կոնկրէտ՝ ազգութիւնը, մշակութային խորհրդանշանների պէս, պատկանում է սակաւաթիւ մարդկանց հոգեւոր արժէքների թուին: Ըստ այդմ՝ ազգը ոչ թէ մշակոյթ արարողն է, այլ մշակոյթի արդիւնքը՝ արարեալը՝ ինքնին հանդիսանալով համաշխարհային պատմութիւն եւ միաւորել-կրելով ցեղի ու ժողովրդի յատկանիշները<sup>64</sup>: Ռուդոլֆ Ծտայնէրի<sup>65</sup> փիլիսոփայական հայեցակարգում ժողովրդի կամ ազգի ոգին (փիլիսոփան դրանք չի տարրերակում) ոչ թէ զգայապէս մարմնաւորուող, այլ զգայապէս հայուող էութիւն է, որ ձեւաւորւում է «հոգէաշխարհի նիւթից»՝ անմիջապէս արտայայտուելով «զգացողութիւնների, զգացմունքների, հակումների եւ այլնի մէջ, որոնք ընդհանուր են մի ժո-

ղովրդի համար: ...Ժողովրդի ոգու այդ հոգեմարմինը,- շարունակում է թէոսոֆը,- նման է ամպի, որի մեջ ապրում են ժողովրդի անդամները, որի ներգործությունները դրսևորում են համապատասխան մարդկանց հոգիներում եւ որք սակայն չի ծագում հենց այդ հոգիներից»<sup>66</sup>: Հետեւաբար՝ ազգային ոգին ոչ թէ «դատարկ վերացականութիւն» է, այլ էութիւն է եւ կեանք: Իսկ Նիցչէի Գերմարդու համար ոգին «պայքարների ու յաղթանակների մունետիկ, ընկերակից ու անդրադարձ» է, որ միմեանց է շողկապում տեսանելի-կառուցողականը հոգեւոր-աննիւթականին. «Ոգին,- սահմանում է նա,- կեանք մխրճուող կեանքն է, սեփական տառապանքով նա իր համար սեփական իմացութիւնն է բազմապատկում»<sup>67</sup>:

Փիլիսոփայական այս մեկնակէտերից պէտք է ընկալել նաեւ Չարեանի պատմահայեցութիւնը: Ազգային ոգին նա գետեղում է ազգի դիցարանական մտածողութեան հիմքում՝ իրրել տիեզերական կամք եւ բացարձակ ազատութիւն, որին նոյնարժէք է կեանքը: Ըստ այդ հայեցակարգի՝ առասպելն ազգի կեցութեան ոլորտից օտարում է մարդկային կեցութեան ժամանակը, որ ենթակայ է քայքայման, ոչնչացման, եւ ենթարկւում միայն տիեզերական ժամանակի տիրոջթին: Այն դարերի ընթացքում առանձին ենթագիտակցութիւնների երեւակայութեանը սնունդ մատակարարող «ամբողջական աշխարհազգացում» է, որի միջոցով հնարաւոր է իրականացնել հաւաքական գիտակցութեան ազգային իղէալը. «Միթոսը կեանքի հիմքն է, դարձ դար ժառանգուած այն հոգեշունչ ձեւացումը, որ առաջ է գալիս, ծնում եւ հոսում է ենթագիտակցութեան պայծառ եւ մշտատեւ աղբիւրից: ... Միթոսը կեանքի օրինաւորումն է: Տեւականը, որ գալիս է անհատի մէջ թաքնուած կորիզային գորութիւնները պայմանաւորող կենսական հոսանքներից: Ազգի գոյութիւնը արդարացնող հոգեկան կերպը եւ արտայայտչական ձեւը սերտօրէն կապուած են այդ տիրական լոյսին»<sup>68</sup>: Հայր դարերով ձեւատեղծել է իր ոգու գոյացման նախնական խորհրդանշանները եւ իրրել «բարդ լինելիութեան հիմնաքար» գետեղել ճարտարապետական խոյանքների աներեւոյթ երաժշտականութեան մէջ: Հայ ոգու հանճարը քարին շունչ ու հոգի է ներարկել՝ նրանով եւ նրանում պահպանելով «ցեղային հիմնագծերը ... ամբողջացած, քիւրեղացած, գերագոյն ներդաշնակութեան ձեւով»: Իր ամբողջականութեանը նա կարող է հասնել, եթէ միաւորի հոգեւոր իմացարանական կեանքն ու միտքը իր մարմնային էութեանը, յստակ գիտակցի ու ճանաչի իր ազգային հոգեբանութիւնն ու առասպելային աշխարհը: Ազգը սահմանելով որպէս ոգի կամ

միթոս՝ գրողը նրա գոյութենականութիւնն ու ազատութիւնը պայմանաւորում է մշակութային լինելու հանգամանքով, որին, անշուշտ, սերտորէն շողկապուած է նաեւ կրօնական աշխարհագրագոգութիւնը. «Ոգին ստեղծագործական ոյժ է դառնում, երբ նա վեր է ամուսն կենդանի մարմնի: Ժողովուրդները ողջ են, երբ հետապնդում են իրենց ներքին, խոր օրէնքը: Կեանքը, իսկական կեանքը գաղափարների քանակութիւն չէ, այլ հոգեկան որակ, կեցուածք, կենսական որոշ արտայայտչական ձեւ, պատասխանատուութեան զգացում եւ ստեղծագործական կարողութիւն»<sup>69</sup>: Որպէս օրինակ նա բերում է Յունաստանը՝ դիտելով, թէ այն գոյութիւն է ունեցել ոչ որպէս պետութիւն, այլ որպէս մշակոյթ՝ այսօր էլ գոյելով իբրեւ մշակութային ժառանգութիւն:

Ուստի մշակոյթը ազգի կեցութիւնն է, հաւաքական գիտակցութիւնը, կրօնական խորհրդանիշը: Այս համատեքստում քննարանելով հայ ժողովրդի պատմութեան փիլիսոփայութիւնը եւ հայ ժողովրդին դասելով նախամշակութային ազգերի թուին՝ Չարեանը դեռ Մեհեանում հրատարակած էսսէներում, բանավէճերում, ապա յետագայում Անցորդում եւ Նախատոմարներում, հանճարեղ յայտնատեսութեամբ, միանգամայն ինքնատիպ լուծում է առաջադրում՝ ազգի պատմութեան հարցականներին՝ վերաքննելով եւ ազգային հայեցակարգի գիտանկիւնից արժեւորելով ի. դարասկզբին լայն տարածում ստացած եւ ազգայնական շարժում ձեւաւորած ցեղակրօնական-ցեղապաշտական ուսմունքը: Խօսքն արիականութեան մասին է, որի կրօնահայեցութեան հիմքը ազգի յարակալութեան խորհուրդն է, իսկ իղէայլը՝ Հերոսը կամ Գերմարդը: Նրա միջոցով ազգը պիտի ձեւաստեղծի եւ գիտակցի սեփական հոգեւոր ինքնութիւնը: Վերջինիս նախատիպը հայ դիցարանութեան մէջ, ըստ Չարեանի, Արան է՝ «էրբ կամ Հեռ հայր»: Մեռնող-յարութիւն առնող աստուածը միակն է, ըստ Պղատոնի յիշատակութեան, որ եղել է Հաղէսի ստորերկրեայ թագաւորութիւնում եւ վերադարձել: Նրա կերպարը մարմնաւորում է հայի եւ Հայաստանի կործանման ու վերածննդի պարագոքը. «Հայոց թագաւորը, հայ սրտի արքան, հայ լեզուի լուսաւոր եւ գեղեցիկ ոգին: Նա՝ որ այստեղ, երեք աւազանների մօտ՝ Ուրմիայի, Սեւանայ եւ Վանայ լճերի մօտ»<sup>70</sup> դեռ շարունակում էր տեսնել ահաւոր մահերի դժոխքը, ժայռերի մէջ պեղուած անդնդային ստորերկրեաները, լեռների ծոցին թաքնուած սուկայի ողբերգութիւնները, նա՝ որ պիտի վերադառնայ: ...Հայ ոգին՝ Արան պիտի վերադառնայ: Ես լսում եմ, քառսի յետեից քերովբէները շեփորում էին ոսկեծայն կանչեր եւ լոյսերի մէջ առաջանում էր, վստն եւ գեղեցիկ, նա-

խապղատոնը եւ նախաքրիստոսը՝ արքան յոյսերի, մեծ տեսանողը, Արամ»<sup>71</sup>։ Գրողը խորապէս հաւատում է «Ապագայի տաճարի» վերածննդին եւ ցեղապաշտական իր հայեացքները մատուցում որպէս մշակութային ծրագիր։

Անցորդը եւ իր ճամբան օրագրութիւնում մի հատուած կայ՝ «Արեւելք եւ Արեւմուտք»<sup>72</sup> վերնագրով։ Այստեղ, քննելով այս երկու աշխարհամասերի պատմափիլիսոփայական, քաղաքատնտեսական, մշակութարանական ու այլեւայլ խնդիրներ, գրողը փորձում է յայտնարել Հայաստանի դերն ու նշանակութիւնն այդ քաղաքակրթութիւնների բախման կիզակէտում, քանզի «Բոլոր հոգեպաշտական շրջաններում Արմենիան օրակարգի վրայ է։ Էգոտերիկ քացատրութեամբ, Արմենիան պատ է նշանակում։ Այն, որ պիտի առաջը առնի, պաշտպանի։ Այնտեղից պիտի վերսկսուի նոր աշխարհը»<sup>73</sup>։ Ի. դարասկիզբին համաշխարհային պատմութիւնը նոր փուլ թեւակոխելով՝ արձանագրում է արժէքային համակարգի ոչնչացումը՝ մարդկութեանը պարուրելով մտաւոր ու հոգեւոր մի նոր տազնապի մղձաւանջով։ Երկրագնդի քարտէզը ենթարկւում է տարարնոյթ փոփոխութիւնների. ձեւաստեղծւում են աստուածապետական ու մշակութային երկրներ, տնտեսապէս գերհզօր նորանոր պետութիւններ։ Պատմական տեղաշարժերի ու հիստորիայի այս փուլում, երբ Արեւմուտքն իր մայրամուտն է ապրում, իսկ Արեւելքը դեռ նոր-նոր պիտի թեւակոխի մշակութային դարաշրջան, շարունակում է առկախ մնալ Հայաստանի ճակատագիրը. «Չորս աշխարհների մէջ կանգնած, միս-միմակ, ապոկալիպսեան ո՞ր տեսարանի մէջ նա պիտի իրականանայ եւ որպիսի՞ տեւակ տեսիլքով պիտի յայտնուի»<sup>74</sup>։ Կը շարունակի՞ կրկնել իր նախնիների սխալները, թէ՞ կը կարողանայ դրսեւորել իր ազգային ինքնութիւնը, կը կառչի՞ մեռնող քաղաքակրթութիւնից, թէ՞ կ'ընտրի Արեւելքը՝ հանդիսանալու «մշակութային կենտրոն» եւ իրրեւ փիւնիկ կը յառնի՞ վերակերտելու սեփական ճակատագիրը, իմաստաւորելու պատմութեան անցած ուղին, կ'անհետանա՞յ պատմութեան թատերարեմից, թէ՞ կը գտնի այն իւրայատուկ ձեւը, որով կը կարողանայ յարաբերակցուել աշխարհի ու տիեզերքի հետ, որով կը կարողանայ բարձրախօսել եւ իր ձայնը լսելի դարձնել։ Եւ քանի որ պատմութեամբ է արձանագրուած, թէ «հաստատեցնական շրջանները մեծ արուեստ եւ գրականութիւն չեն ստեղծած», Չարեանը, քրմի պատգամախօսութեամբ, շտապում է նախազգուշացնել. «Այն այն ազգին, որ իր դէմքը կորցնում է եւ ծախում իր հոգին։ Նրան մահ է սպասում»<sup>75</sup>։

Այս հարցականների լուծման կանխադրոյթով Ջարեանը միանգամայն ուշագրաւ մօտեցում է ցուցաբերում՝ Հայաստանի աշխարհագրական դիրքը, նրա սահմանները վերլուծելով պատմահայեցութեան նորովի մատուցմամբ:

Ճակատագրականօրէն մեր երկիրը մշտապէս գտնուել է Արեւելքի ու Արեւմուտքի բախումների կիզակէտում՝ տարանցիկ ուղի հանդիսանալով երկու աշխարհամասերի համար: Մինչդեռ ո՛չ Արեւելք է եւ ո՛չ Արեւմուտք, այլ այն կենտրոնը, ուր գտնուում է Արեւելքի ու Արեւմուտքի միաձուլման գաղտնիքների բանալին իբրեւ «հոգեկան իրականութիւն, խորհրդապաշտական անհրաժեշտութիւն»<sup>76</sup>: Ուստի Հայաստանը պիտի փորձի հաշտեցնել կամ, աւելի ճիշտ, միաւորել Արեւելքի տիեզերական բանականութիւնն ու փիլիսոփայական ներհայեցողականութիւնը Արեւմուտքի գործնականութեան հետ, առաջինի աւանդակեցութիւնն ու բարոյարանական անխախտ օրէնքները միւսի փոփոխական ձգտումների հետ, մէկի անապատային բնոյթը, երազկոտութիւնն ու երեւակայութիւնը միւսի ծովային արկածախնդրութեանը: «Երբ հայ ժողովուրդը խոր այդ գիտակցութեան հասնի, նա կը գտնի իր ճանապարհը: Նա այլեւս մութացկանի աչքերով ուրիշների նայուածքները չի փնտռի... որովհետեւ, - ու՞ր տեսնուած է, որ ազգայինը արծիւներին թռչել սովորեցնեն»<sup>77</sup>:

Մի առիթով գրողը գրում է, թէ իւրաքանչիւր ազգի ճակատագրականօրէն նախասահմանուած է մի որոշակի առաքելութիւն, որ պէտք է իրականացնի. «Մենք գործում ենք միայն անկարելիի հրապոյրի մղումով: Մի ընկերութիւն, որ անկարող է ստեղծել մի ուտոպիա, վիճակուած է մեռնելու: Նոյնը՝ ազգային գաղափարը: Մենք միշտ մոռանում ենք, որ բուն ազգը չէ, որ մեզ հետաքրքրում է, այլ այն գաղափարը, որ մենք կազմում ենք ազգի մասին»<sup>78</sup>: Հայաստանի եւ հայ ժողովրդի պարագայում դա մշակութային նոր դարաշրջանը բացելու եւ նրան ուղղութիւն տալու, նոր՝ «արեւային մշակոյթ» ստեղծելու առաքելութեան մեջ է. «Հայ ժողովուրդն է, - Մուշեղ Իշխանի»<sup>79</sup> հետ գրոյցներից մէկում մարգարէանում է գրողը, - որ պիտի տիրէ Մերձատր Արեւելքին: ... Մենք ենք միայն որ ընդունակ ենք մշակոյթ եւ քաղաքակրթութիւն ստեղծելու, մինչդեռ մեզ շրջապատող, մեզ հարուածող ժողովուրդները բիրտ ոյժը կը ներկայացնեն: Անոնք դատապարտուած են փոշիանալու, ինչպէս փոշիացան պատմութեան ընթացքին նիւթական ուժերու վրայ յենած բոլոր պետութիւնները: Իսկական եւ անկորնչելի արժէքը մշակոյթն է: Մենք մեր ազգային բնատուր տաղանդով եւ ստեղծագործ

կարողութեամբ պիտի տանինք վերջնական յաղթանակը»<sup>80</sup>։ Յեղակրօնութեան այս դաւանանքը, մշակութային ծրագրի փոխաձեւութեամբ, չի նշանակում վերադարձ վաղուց մոռացուած «հին աստուածներին»- ոչ թէ հեթանոսականութիւն, ինչպէս կարծում էին Նաւասարդի<sup>81</sup> շուրջ համախմբուած արուեստագէտները, այլ մեհենականութիւն՝ հայ ոգու, լեզուի «պաշտամունք եւ արտայայտութիւն»՝ նոր մեհեանի տաճարում։ Ընդ որում, գրողը ոչ թէ մերժում է քրիստոնէութիւնը կամ հրաժարւում նրանից, այլ ճիշտ հակառակը, անհրաժեշտութիւն է համարում «Հայուն Յիսուսին» ճանաչելն ու սիրելը, ինչպէս նրան ճանաչել են ու սիրել Դանթէն, Վերասկէսը, Եակոբ Սմիթը, Միւրիլլօն, Լէոնարդօ դա Վինչին<sup>82</sup>։ Յիսուսը պիտի դառնայ հայի հոգեւոր ինքնութիւնը, իսկ արուեստագէտը պիտի նրան վերածի սրբապատկերի ու «արուեստ ստեղծի նրանով», քանզի Յիսուսն ինքնին արուեստն է. «Ուշագրաւ է, դիտում է Զարեանն իր «Հայուն Յիսուսը» էսսէում, - որ այն ժողովուրդները, որ կը սիրեն եւ կը տեսնեն Յիսուսը, կը զարդարեն զայն։ Անոր վերքերը քանկագին քարերով կը փայլեցնեն եւ իր շարչարուած մարմինը կը փաթթեն ոսկեգօծ նկարներով հեռուած, գոյնզգոյն կտաւներու մէջ»<sup>83</sup>։ Ահա թէ ինչու այդ ժողովուրդների համար Յիսուսը ոչ թէ «մարտիրոս» է, այլ «արուեստագէտ»։ Այս իմաստով միանգամայն հասկանալի է, թէ ինչու է գրողը հակադրւում Եպենգլէրի կողմից հայ ժողովրդին կրօնական ազգերի շարքում դասելու տեսակէտին<sup>84</sup>։

Ըստ էութեան հայկական առասպելին գեղարուեստական ձեւակերպում տալու այս ծրագիրն ինքնին համադրոյթն է՝ հայ ոգու եւ Հայաստանի պատմութիւնը միայն բանականութեան օրէնքով ստուգարանելու, նրան փիլիսոփայական ուղղուածութիւն տալու ուստիստական մղումին։ Սա էլ, ըստ Սերգէյ Սարինեանի<sup>85</sup>, Ի. դարասկզբի հայոց ազգային գաղափարաբանութեան հիմնադրոյթն է. «Ազգային գաղափարաբանութիւնը, - սահմանում է ակադեմիկոսը, - յարաբերական է ազգային ոգուն։ Բայց «ոգին» եւ «գաղափարը» նոյնարժէք հասկացութիւններ չեն։ Ոգին իռացիոնալ է, նախաստեղծ, անգիտակցական եւ անբանաձեւելի։ Գաղափարը երեւութաբանական է։ Նա ոգու արտածումն է գիտակցութեան մէջ։ Նա գործ ունի ազգի հոգեւոր ու ֆիզիկական կազմոյթի տնտեսական, սոցիալական, քաղաքական, մշակութային ինքնութեան փորձառական իմացութեան հետ։ Այս իմաստով կարելի է սահմանել, որ ազգային գաղափարաբանութիւնը տուեալ ազգի պատմութեան փիլիսոփայութիւնն է, ազգի մտաւոր գործունէութեան ամբողջ փորձի տեսական համադրութիւնը՝ գիտական, գեղարուեստ-

տական, բանահիսական, կրօնական եւ այլն»<sup>86</sup>: *Ըստ Զարեանի՝ հայ ժողովուրդը չի ստեղծել իր ոգու պատմութեան փիլիսոփայութիւնը, որ պիտի հանդիսանար իր ներքին, հոգեկան կեանքի անհրաժեշտ իրականացումը, չի ձեւարանել այն առանցքը, որով պիտի ստեղծէր իր «գոյութեան ուրոյն եւ ինքնայատուկ ձեւը»։ Պատմութեան փիլիսոփայութեան բացակայութեամբ է պայմանաւորուած Հայաստանի ողբերգութիւնը, եւ գրողը փորձում է ձեռնամուխ լինել այդ հսկայական պարապը լրացնելու տիտանական սխրանքին՝ իր դաւանանքն ամփոփելով աֆորիստիկ հնչողութեամբ. «Ճակատագիրը յաղթելու ներքին անհրաժեշտութիւնից առաջ են գալիս դիցաբանական մեծ պայքարները»<sup>87</sup>:*

*«Իւրաքանչիւր ժողովուրդ,- ասում է Հիպոլիտ Թէնը,- ունի իր հերոսներն ու աստուածները, նրանց դուրս է քաշել նա իր սրտից, նրանց սնուցում է նա իր առասպելներով. ինչքան առաջ է գնում նա նորագոյն դարերի եւ ապագայ պատմութեան ամայի անյայտութեան մէջ, այնքան նրանց անմահ պատկերները փայլատակում են նրա աչքերի առջեւ, որպէս բարի ոգիներ, որոնք պէտք է նրան առաջնորդեն ու պաշտպանեն»<sup>88</sup>: Զարեանական մտորումներում պատմափիլիսոփայական այդ համակարգը արձանագրում է գրեթէ նոյնութեամբ. «Երբ երեւակայութիւնը միանում է ներշնչման, անցեալի հորիզոնը բռնկում է, եւ նախատիպարները վերադառնում են դէպի կեանք: Բացում է առասպելներ կերտող գորութիւնների աշխարհը, եւ յուշերի վտիտ աղբիւրներից դուրս են ժայթքում հիմնական երգերի անգուսպ հոսանքները: Հնչում են դիւցազներգութեան թագաւորական ոտնաքայլերը: Վերագտնում է առաջնորդող միթոսը»<sup>89</sup>: Օրագրային գրառումներում գրողը յաճախ է յիշատակում «Մասունցի Դաւիթ» դիւցազներգութեանն անդրադառնալու իր ցանկութիւնը, քանզի խորապէս հաւատացած է, թէ ազգի գոյութեանականութիւնը պայմանաւորուած է ազգային առասպելարանութեան ու դիւցազներգութեան՝ փիլիսոփայական աշխարհագրագոյութեամբ, դրանց նորովի մեկնարանմամբ. «Մեկնարանութիւն «Մասունցի Դաւիթին»: Այնպէս, ինչպէս որ [Միգէլ դէ] Ունամունօն գրել է Դոն Կիխոտի համար: Լաւ կը լինէր...»<sup>90</sup>:*

*Դիւցազնավէպն ու դիցաշխարհը, ըստ գրողի, ազգի պատմութեան մշակութային խտացումն են, ազգային իդէալի ամբողջականացման ձգտումը, իմացարանական բարձրագոյն մակարդակը, իրականութեան ընկալման եւ արտացոլման շարժունակ, զարգացող համակարգը. դրանք քառսից սեփական երկրի արարչագործութեան արձագանգներն են ու նրա ժամանակաւոր գոյութեան վերարբերեալ պատկերացումների*

յաղթահարումը: Ուստի պատահական չէ զարեանական այն տեսակէտը, թէ հայոց դիւցազներգութեանը պիտի մօտենայ ոչ թէ քրիստոնէական, այլ դիւցական աշխարհայեացքով, այսինքն՝ ըստ գրոյթի<sup>91</sup>:

Սա, անշուշտ, Չարեանի ուտոպիստական ցանկութիւնն էր, ինչն, ի դէպ ոչ-պատահականօրէն, նրա գրառումներում այդպէս էլ մնաց իր-րեւ բաղձալի երազանք...:

Ուշագրաւ ու հրապուրիչ է Չարեանի պատմահայեցակարգին բնորոշ մի իւրայատկութիւն: Խօսքն ազգերի ու երկրների՝ այսպէս ասած սեռային՝ իգական եւ արական պատկանելութիւնների դասակարգման մասին է, որի ակունքում ընկած է Նիցչէի կամապաշտական փիլիսոփայութիւնը:

Շօշափելով կնոջ կերպարանախօսութիւնը, սեռային եւ այլ հարցեր՝ Նիցչէն կնոջ կենսաբանական բուն գործառոյթը (սերնդագործութիւն) համեմատում է յոյների արարչական բնոյթի հետ, նրանց՝ յոյներին վերագրելով արարչագործութեան կենսաբանական իւրայատկութիւններ: Այս գրոյթը Չարեանը զարգացնում է, առաւել ընդգծուած ու մի փոքր այլ յոյսի տակ է մեկնաբանում եւ մատուցում<sup>92</sup>: Ըստ գրողի՝ այն երկիրն ու ազգը, որն ի վիճակի չէ մշակոյթ արարել, կրում է ստորադաս յատկութիւններ: Այդ ազգերը կամ երկիրները իրենց բնոյթով կանացի են: Այդպիսիք են, օրինակ, հրեաները, այդպիսին են Թուրքիան, ԱՄՆը, իր տարագրութեան ընթացքում այդպիսին են ներկայանում Աւստրիան, Իտալիան, Ֆրանսիան, եւ հակառակը, այն ազգերը կամ երկիրները, որոնք ներկայանում են սեփական դիմագծով, պատմութեան էջերը յաղթահարել եւ շարունակում են յաղթահարել շնորհիւ մշակութային արարչագործութեան, կրում են առնականի կենսաբանական յատկանիշներ: Այդպիսին են յոյները, այդպիսին են Հոլանդիան, Իսպանիան, այդպիսին պիտի լինի հայ ազգը, քանզի «...Մեր ցեղը խորապէս առնական է» ու «ստեղծաբան»<sup>93</sup>: Հայ ազգն իր բնոյթով ու սեռային պատկանելութեամբ առնական-արիականի, ուրեմն եւ կատարեալի, բացարձակի, գերագոյնի կրողն է: Իսկ այդ յատկանիշները գրողը դիտարկում եւ քննաբանում է բարձրագոյն ոլորտում՝ մշակոյթի պատմութեան համապատկերում, այդ իսկ պատճառով այն քննարկելի է գրողի գեղագիտական հայեացքներին զուգահեռ:

## ԾԱՆՕԹԱԳՐՈՒԹԻՒՆՆԵՐ

<sup>1</sup> Նարինէ Պետրոսեան, «Քաղաքը կոստան Չարեանի Օրագրերում», Հայկազեան Հայագիտական Հանդէս, Հտր. Իէ., Պէյրուիթ, 2007, էջ 161-178:

- <sup>2</sup> Կոստան Զարեան, *Երկեր*, Տպարան Կաթողիկոսութեան Հայոց Մեծի Տանն Կիլիկիոյ, Անթիլիաս, 1975, էջ 15:
- <sup>3</sup> Կոստան Զարեան, *Դէպի Արարատ*, Սարգիս Խաչենց, Երևան, 2001, էջ 303:
- <sup>4</sup> Զարեան, *Երկեր*, էջ 310:
- <sup>5</sup> Կոստան Զարեան, *Նաւատումար*, Սարգիս Խաչենց, Երևան, 1999, էջ 227:
- <sup>6</sup> Նոյն:
- <sup>7</sup> Նոյն, էջ 228:
- <sup>8</sup> Նոյն:
- <sup>9</sup> Զարեան, *Երկեր*, էջ 297:
- <sup>10</sup> Զարեան, *Նաւատումար*, էջ 228:
- <sup>11</sup> Նոյն, էջ 222:
- <sup>12</sup> Նոյն, էջ 220:
- <sup>13</sup> Նոյն, էջ 219:
- <sup>14</sup> Նոյն, էջ 220:
- <sup>15</sup> Նոյն, էջ 217:
- <sup>16</sup> Նոյն, էջ 218:
- <sup>17</sup> Նոյն, էջ 222:
- <sup>18</sup> Զարեան, *Երկեր*, էջ 299:
- <sup>19</sup> Նոյն, էջ 113:
- <sup>20</sup> Նոյն, էջ 289:
- <sup>21</sup> Նոյն, էջ 469:
- <sup>22</sup> Կարօ Փոյատեան, *Զրոյց*, Բ. Հար., «Յուսարեր», Գահիրէ, 1961, էջ 236:
- <sup>23</sup> Հիպոլիտ Թէն՝ կուրուր-պատմական դպրոցի հիմնադիրը: Նրա հիմնական աշխատութիւնը կոչուած է *Գեղարուեստի Փիլիսոփայութիւնը*, որի հայերէն հրատարակութիւնը իրականացրել է Եղիշէ Զարենցը 1936ին: Թէնը նոյնացնում է քաղաքակրթութիւնը եւ մշակոյթը:
- <sup>24</sup> Հենրի Թոմաս Բոքլի *Անգլիայի Բաղաքակրթութեան Պատմութիւնը* աշխատութիւնը խոր ազդեցութիւն է գործել Հայ տնտեսագիտական եւ մշակութարանական մտքի՝ մասնաւորապէս Միքայէլ Նալբանդեանի եւ Ռաֆֆու վրայ: Բոքլի յիշատակին Նալբանդեանը բանաստեղծութիւն է գրել՝ «Հենրիկոս Բոքլի Յիշատակին» վերտառութեամբ, իսկ Ռաֆֆին *Քաղաքացի Յիշատակարանը* անուղղակիորէն, համրի կերպարի միջոցով է արտայայտել իր համակրանքն այս փիլիսոփայի դրոյթների հանդէպ:
- <sup>25</sup> Եռան Գոթլիբ Յիխտէ՝ գերմանացի փիլիսոփայ, որի *Գիտարանութիւն* (1784) աշխատութեան հիմքում ընկած է ենթակայական իդէալիզմի տեսութիւնը: Նա բանական ճանաչողութեան օրգան էր համարում մտքի միջոցով ճշմարտութեան անմիջական հայեցողութիւնը՝ «ինտելեկտուալ ինտուիցիան»:
- <sup>26</sup> Զարեան, *Նաւատումար*, էջ 399:
- <sup>27</sup> Նոյն, էջ 493:
- <sup>28</sup> Նոյն, էջ 315:
- <sup>29</sup> Զարեան, *Նաւատումար*, էջ 476, էջ 486, 516: «Համազգային» Հայ կրթական եւ Մշակութային Միութիւնը հիմնուել է 1928ին, Գահիրէում՝ Լեւոն Շանթի, Նիկոլ Աղբալեանի եւ այլոց ջանքերով: յատկապէս Սփիւռքում ծաւալում է կրթական, հրատարակչական եւ մշակութային գործունէութիւն:
- <sup>30</sup> «Մենք հերկում էինք» - ասում է ուրիշի կատարածն իրեն վերագրողը:

- <sup>31</sup> Զարեան, *Նաւատումար*, էջ 486-487.
- <sup>32</sup> Նոյն, էջ 527.
- <sup>33</sup> Զարեան, *Երկեր*, էջ 98.
- <sup>34</sup> Տպագրուել է *Յուսարեքում*, Գա՛հրէ, թիւ 297, 26-03-1932, Զարեան, *Նաւատումար*, էջ 340
- <sup>35</sup> Նոյն:
- <sup>36</sup> Նոյն, «Տանջունել ինչպես մէկը, որ ապրում է մի մասնատր դժոխքում, բայց հանգստաւտ» (էջ 563): «Երբ մէջը չես՝ բում է ընտրեալ երկիր, երբ ներսն ես՝ օտար է» (էջ 571): «Այն օրուանից, որ եկել եմ այստեղ, ես նրբեր չեմ եղած հիացման վիճակում, adoratio: Այն վիճակը, երբ բում է, որ մարմինը թեւեր է առնում, որպէսզի հասնի խոր եւ հոգեկան միութեան» (էջ 564): «Ուզում եմ իմացուի, որ ներկայ Հայաստան գալս համարում եմ սխալ: Հայ այսպես կոչուած գրողների թշնամանքը իմ հանդէպ ամեն բանից ցածր է, բորք, ստոր... Ոչ մի ժամանակ կեանքումս, ոչ մի երկրում այդպիսի մեմակութիւն չեմ ապրել եւ այդպիսի հոգեկան վիճակի չեմ ենթարկուել...» (էջ 573):
- <sup>37</sup> Զարեան, *Նաւատումար*, էջ 566.
- <sup>38</sup> Նոյն, էջ 565.
- <sup>39</sup> Նոյն:
- <sup>40</sup> Զարեան, *Երկեր*, էջ 605.
- <sup>41</sup> Նոյն, էջ 605-606.
- <sup>42</sup> Զարեան, *Նաւատումար*, էջ 235.
- <sup>43</sup> Զարեան, *Երկեր*, էջ 60.
- <sup>44</sup> Լէօն Բլուա (1846-1917) *Ֆրանսիացի գրող*:
- <sup>45</sup> Զարեան, *Երկեր*, էջ 68:
- <sup>46</sup> «Նախատիպ. դրանք շարժառիթներ են, ռեակցիաներ որոշ իրավիճակների նկատմամբ: Ոչ թէ գաղափարներ, ոչ թէ պատկերներ, այլ վերաբերմունք, հոգեկան գործունէութիւնից ժառանգած արարողութիւն: Սիւժէի նախազոյ համակարգ՝ ոգուն բնորոշ, որի շուրջը բիրեղանում է կենսափորձից ժառանգուած պատկերը...», Զարեան, *Նաւատումար*, էջ 495.
- <sup>47</sup> Զարեան, *Երկեր*, էջ 40.
- <sup>48</sup> Նոյն, էջ 41:
- <sup>49</sup> Նիցշէ, *Փրիդրիխ* (1844-1900) գերմանացի փիլիսոփայ: Նիցշէի կամապաշտական փիլիսոփայութեան հիմքում ընկած է Գերմարդու գաղափարը, որին հասնելու բացարձակ ուղին կամքն է, ոչ թէ բանականութիւնը (*Այսպէս Խօսեց Չրադաշտը, Բարուց եւ Զարբից Այն Կողմ, Իշխանութեան Կամք եւն*): Այլ կերպ ասած՝ զարգացման համընդհանուր շարժիչ ուժը «գոյութեան պայքարն է», որը վերանում է իշխանութեան կամքի:
- <sup>50</sup> Շպենդլէր, *Օսվալդ* (1880-1936) գերմանացի փիլիսոփայ: *Արեւմուտքի Մայրամուտը* (1918-1922, 2 հատորով) աշխատութեան մէջ Շպենդլէրը քննարանում է քաղաքակրթութիւնների պատմութիւնը: Ըստ նրա՝ դրանք ութն են եւ միմեանցից անկախ են: Մշակոյթները ծնւում են, երիտասարդանում, մեռնում՝ սպառելով իրենց արժէքները եւ վերածուելով քաղաքակրթութիւնների: Այլ կերպ ասած՝ Շպենդլէրը տարբերակում է միմեանցից մշակոյթը եւ քաղաքակրթութիւնը, իսկ համաշխարհային պատմութիւնը դիտում է միմեանցից անկախ քաղաքակրթութիւնների պատմութիւն:
- <sup>51</sup> Առնոլդ Զոգէֆ Թոյնրի (1889-1975) անգլիացի պատմաբան եւ ընկերաբան: Համաշխարհային պատմութիւնը եւ հասարակութեան առաջադիմութիւնը դիտում է իրրեւ:

փուլային քաղաքակրթութիւնների հանրագումար: Պատմութեան շարժիչ ուժերի  
խնդիրը նա գուգակցում է «Աստույ յայտնութեան» որպէս պատմութեան իմաստի  
ընդունման, պաշտամունքի հետ: Նրա հիմնական աշխատութիւնն է *A Study of  
History*:

<sup>52</sup> Arnold Toynbee, *Postijenie Istorii* (Պատմութեան հետազոտութիւնը), Մոսկուա, 1991,  
էջ 95:

<sup>53</sup> Osvald Shpengler, *Zakat Evropi* (Եւրոպայի մայրամուտը), Մոսկուա, 2003, N 2, էջ 114:

<sup>54</sup> Ջարեան, *Դէպի Արարատ*, էջ 304-305:

<sup>55</sup> Ջարեան, *Նաւատումար*, էջ 459:

<sup>56</sup> Shpengler, էջ 87-192:

<sup>57</sup> Ջարեան, *Նաւատումար*, էջ 430:

<sup>58</sup> Նոյն, *Նաեւ՝ Գեղունի, Վենետիկ, Սուրբ Ղազար*, 1950:

<sup>59</sup> Ջարեան, *Նաւատումար*, էջ 463:

<sup>60</sup> Միգէլ դէ Ունամունո (1864-1936) իսպանացի գրող, բանաստեղծ, փիլիսոփայ:

<sup>61</sup> Ջարեան, *Նաւատումար*, էջ 568:

<sup>62</sup> Ջարեան, *Երկեր*, էջ 92:

<sup>63</sup> Shpengler, էջ 174:

<sup>64</sup> Նոյն, էջ 160-192:

<sup>65</sup> Ռուդոլֆ Ետայնէր (1861-1925) գերմանացի թէոսոֆ, անտրոպոսոֆ, «Գէօթենաումի»  
հիմնադիրը: Նրա հրատարակուող երկերի ամբողջութիւնը հաշոււմ է 352 հատոր:

<sup>66</sup> Ռուդոլֆ Ետայնէր, *Թէոսոֆիա*, Երեւան, 2003, էջ 317:

<sup>67</sup> Ծ. Նիցշէ, *Այսպէս Խօսեց Ջրաղաշտը*, Երեւան, 2002, էջ 129:

<sup>68</sup> Ջարեան, *Դէպի Արարատ*, էջ 299-301:

<sup>69</sup> Ջարեան, *Երկեր*, էջ 168:

<sup>70</sup> «...Մեծ երեք աւազաններ. հալած ոսկի, պաղ եւ ջրացած կապար եւ թրուած  
երկաթ», Ջարեան, *Երկեր*, էջ 642:

<sup>71</sup> Նոյն, էջ 643:

<sup>72</sup> Նոյն, էջ 222-244:

<sup>73</sup> Ջարեան, *Նաւատումար*, էջ 408:

<sup>74</sup> Ջարեան, *Երկեր*, էջ 76:

<sup>75</sup> Նոյն, էջ 25:

<sup>76</sup> Նոյն, էջ 242-243:

<sup>77</sup> Նոյն, էջ 169:

<sup>78</sup> Ջարեան, *Նաւատումար*, էջ 529:

<sup>79</sup> Մուշեղ Իշխան, բուն անունով Ըննտերեճեան, (1913-1990) իրանանահայ բանաստեղծ,  
արձակագիր, թատերագիր, մանկավարժ, հեղինակ տասնեակ հատորների:

<sup>80</sup> Մուշեղ Իշխան, *Իմ Ուսուցիչներս*, Համազգային Վահէ Սէթեան Տպարան, Պէյրուիթ,  
1984, էջ 192:

<sup>81</sup> Մեհեանից Հեռանալուց յետոյ Դանիէլ Վարուժանը հիմնադրում եւ հրատարակում է  
Նաւասարդ տարեգիրքը (Պոլիս, 1914), որի միայն մէկ հատորը լոյս տեսաւ:

<sup>82</sup> Վերածննդի ժամանակաշրջանի նկարիչներ, արուեստագէտներ:

<sup>83</sup> Ջարեան, *Նաւատումար*, էջ 87:

<sup>84</sup> Shpengler, N 1, էջ 258, 260, Shpengler, N 2, էջ 333-334, նաեւ՝ Ջարեան, *Նաւատումար*,  
էջ 228-229:

- <sup>85</sup> Սերգէյ Սարինեան Հայ գրականութեան պատմութեան տեսարան, գրաքննադատ: Նրա հիմնական աշխատութիւնը Հայոց Ազգային Գաղափարաբանութիւն պատմաքննական տեսութիւնն է:
- <sup>86</sup> Սերգէյ Սարինեան, Հայոց Ազգային Գաղափարաբանութիւն, «Զանգակ-97», Երևան 2005, էջ 4:
- <sup>87</sup> Զարեան, Երկեր, էջ 18:
- <sup>88</sup> Թէն, Գեղարուեստի Փրիստիայութիւնը, էջ 475:
- <sup>89</sup> Զարեան, Նաւատուար, էջ 430:
- <sup>90</sup> Նոյն, էջ 572:
- <sup>91</sup> Նոյն, էջ 516:
- <sup>92</sup> Առաւել մանրամասն տե՛ս՝ «Հայուն Յիսուսը» էսսէն, Զարեան, Նաւատուար, էջ 83-89:
- <sup>93</sup> Զարեան, Դէպի Արարատ, էջ 305:

THE HISTORICO-PHILOSOPHICAL PERCEPTION OF  
ARMENIA AND THE ARMENIANS IN  
THE DIARIES OF COSTAN ZARIAN  
(Summary)

NARINE PETROSSIAN

The smallest geographic entity in the diaries of the writer Costan Zarian is the city, which was discussed in the previous volume of the *Haigazian Armenological Review*. A larger entity, the country, is highlighted in this article.

Zarian did not acknowledge the existence of borders and boundaries within states; in fact, he did not recognize any boundaries in the real world as well as in the universe. However, he noted that the ethnographic and geographic entities registered in his diaries display unique features which are specific to the given country and display the spirit and mentality which enable the ethnic group or the nation to continue as such. This driving force enabling the survival of the group might be tradition, culture, language, religion or their combination, all of which Zarian depicts while writing about a country. Zarian believed that, as a heavenly gift, these features impacted the individual's self-perception, national identity, imagination and psychological state.

Zarian thought that every country had a core secret which was difficult or impossible to understand. However, we need to communicate with that secret. For Zarian the core secret of Armenia was a mode of existence and a principle. It was his biography and the documented narration of a creative life, a means to disclose his own identity which he analyzed through the triangular framework of country (body), nation (spirit), and ideology (intellect). Furthermore, Zarian dissected each of these three elements into their sub-ingredients and went further in uncovering their inner aspects.

In this article Petrossian concentrates on Zarian's unfinished mythic creation, on the yet-to-be-disclosed identity and spirit of the Armenian and his historico-philosophical framework. The author delves into tracking the relentless attempts of Zarian in tackling the enigma of Armenia.